

四庫全書

史部

欽定四庫全書

史部

四川通志卷四十二

詳校官監察御史臣李陽棧

檢討臣德生覆勘

總校官編修臣王燕緒

校對官編修臣潘庭筠

謄錄監生臣潘衡

欽定四庫全書

四川通志卷四十二

藝文

記

元羅壽成都瞻學田記

皇元誕受天命奄有萬方列聖繩承詔郡國崇學給田養

士以風天下成都在蜀為會府昔以武定故所校多菜田少中大夫趙公世延使指蜀道憫士習之頽弊教養道息無以承流宣化乃選秀民年二十上下者復其身補弟子員定章程樹令於學以明經治行為業步其地得其畝制其域如市地法會其利入歲以為瞻學永業所輸入廩師弟子有度

所司時其出納馬路總管張保同實總學政間以
論語且曰茲學校之經賦也請記諸石碑固不獲
讓曰成都自丙申蕩於兵文物泯盡構治學舍才
二十八年倚席不講士怠散不能恒其業蓋所授
學田僻遠未墾無所仰哺而然也才之不立則有
司將何以奉揚天休諸大夫可謂知所先矣教養
之道可謂周且恒矣既而推之周官鄉大夫歲時
登夫家之賢者能者莫得攷其羣居族食以養以
教之道其或授田而自食其力大比禮而賓興之
者并授之民也歟何治績之凝隆平之久也漢興
崇儒興學增廣博士弟子縉紳之盛至於環橋門
者億萬計吾見其士類之多於周也未見其比隆
於周也其故何哉噫堯秦之餘非六學之實也百
家之言非聖道之統也修潔博習非道德之蘊也
冠帶委蛇非力田之質也文學賢良非夫家之秀
也方領矩步非樂舞之節也傳疏章句非躬行之

確也胡周之比隆也然猶察舉於鄉閭也不果其行者猶黜也降漢而下學校修而教樹戾文辭侈而士習浮矣科目盛而其進狹矣合而論之道與利而已矣上以道求士之學也為道上以利誘士之學也為利上之所好下必有甚焉者豈不信歟是以漢之士不能並乎周後之來者亦莫漢之盛也蜀有材漢文翁始也前乎文翁也固不能洽先王之化厥後如卿雲坡潁之賢代見時出豈特比齊魯而已哉由是言之漢之士未始異乎周蜀之材亦未嘗不炳然於漢也顧上之人所以造之何如耳方今車書大同厲學興化源流濂洛聖道開明士不力田而得飽於學宮不待察舉鄉閭而可受知於公上無百家之雜科舉之累以荒其志劫少中公開導教化之有則廩食養成之有資士之食於學者曷亦諒之公篤志勵行彊立不反何往先之愧也哉故既紀其實以告將來因著一言思

講評於博
間之君子

鮮璿廟學門記

廟學三門之制禮經無明文璿嘗踰巴蜀浮荆襄漢沔適梁宋鄭衛

歷趙代晉蒲秦陝之學周咨弗能得元貞初職教
成都視綿州學瓦礫中得宋故石碑修學門記磨
滅殆半而門制可攷云古營造法式以上天帝座
前三星曰靈星王者之居象之故以名門先聖為
萬世絕尊古今通祀袞冕南面用王者禮樂廟門
之制悉如之世所謂櫺星及凌霄者承誤也今總
府命大建此門凡柱礎門楹丹雘陞暨石牆陶甃
黜堊之飾俱如法經歷夏從任寶贊襄之厥功告
成復請書其義於石
以昭示永久得無惑

文禮愷金華書院記

國家自延祐始設科悉革浮靡陋習專選經明行修之士

故天下郡縣凡先哲著德立言有功於名教往往
即其生長燕遊之地祠而奉之因即其祠增館舍
貯經籍延師儒以講道遵前賢勵後學也唐拾遺
陳子昂先生梓之射洪人其讀書址在縣之金華
其墓在縣之獨生其文翰議論在文冊天下學者
至今景慕如在目前至正改元冬監縣柏延建言
請擇地勅拾遺書院又援墨池草堂眉山例請建
山長員以職教祀朝省是其言以祠宇未葺學田
未置下有司經度會相延遷秩未果九年春周侯
廷望來尹縣慨然以為已任巡行視縣治之西前
界廟學之墟後枕金華之麓有隙地焉承命芟蕪
規為蔬圃偶於瓦礫中得仆碑雖漫其額題云建
金華書院記侯驚且喜曰方議相攸不圖前代已
有其處且名副其實豈可復易於是捐已俸鳩材
殺募工匠親董厥役越明年秋八月仍故基構正
祠四楹位先生像於中又明年春二月構書樓門

庶齋房若干楹既而重得庶間官田三百餘畝他日收其入以給廩餼而獨坐之祠昔封靈祐丈惠侯額賜英顯久為風雨飄搖亦割俸集士民祈之迹其施設勤矣哉馳書求記欲刻之石禮愷生也

奉廟郡末不敢以菲陋辭竊惟古聖賢之言坦明敷暢日星垂而江河流漢去古未遠體製爾雅降魏晉迄隋士各以纖文麗思雕篆刻為學問之極致大雅絕響久矣唐興猶扇徐庾風獨子昂先生起布衣奮然高蹈追婉六經與西漢並駕不幸嗣君廢御北鷄鳴晨翦滅親賢斯時也羅織紛紛之獄起在朝公卿方視爵祿為鬼朴禁瘠惴惴保首領不暇而先生以一秘書正字悼人之寃閔國之危以崇德緩刑撫慰宗室引古證今反覆論諫又願興大學以教胄子止擊羌之役以保全蜀凡有利害於天下知無不言史臣稱其詞婉意切信手其知言矣後之評史者謂先生諫說武后非狄

公仁傑比或者譏其失言以武后不可與之言遂謂事同而情異殊不究夫先生所謂撫慰宗室者果何異乎其為唐室謀深矣則先生之心即狄公之心也但狄公言之於武后哀老悔悞之際其勢為甚易所以成反正之功先生言之於武后淫虐方熾之時其勢為甚難非惟不見聽竟殞於賊姦之手自古不可以成敗論人原其心可也惟先生以忠厚之心惻怛之意陳救時諄切之言以正大高明之學著雄深雅健之文致杜子美韓退之繼作咸推服為先倡其有補於名教如此崇而祀之禮也雖然書院本為作養人才而設而學者貴窮理以求踐履之實不苟為利祿計今而後相與瞻仰先生之遺像心其心味其旨循進乎孔孟之門嚮不負國家專選經明行修之本意此則周侯之所望於來學而亦鄉人之所願也侯名鶴字廷望晉寧人歷官多善政觀於此舉祭可知矣

遂寧縣旌忠廟記

武信北郭去城闈百舉武有廟曰旌忠神之爵封顯忠昭惠英

烈仁濟王蓋昔忠臣夏公之祠也予幼時常與師友遊廟中觀右廡壞壁間有前賢題詩轉省七十年尚記其詞而忘其名其詩云唐季紛紛幾戰爭東山西蜀又連衡公寧死作泉中鬼義不生為城下盟而其末云史臣秉筆無公論賴有雙碑為發明余詳閱雙碑其一宋政和元年知州李駒所作其一宋嘉定辛未轉運判官費仕幾所述也按史傳公青州人諱魯奇字邦傑唐天祐十二年秋七月晉王存勗勞軍魏縣帥百餘騎巡覘值梁將劉剗伏兵五千圍之公時為裨將操短兵力戰拔王於重圍因賜姓名曰李紹奇是後屢立大功如王彥章梁驍將也馬上持百斤雙鐵鎗所向無前邠州之役公生擒之而梁遂以滅唐明宗天成元年復還其舊姓名四年自河陽出鎮武信其地即遂

州也長興元年東川節度使董璋西川節度使孟知祥連兵反詔公副石敬瑭討之知祥憚公威名遣其心腹李仁罕趙廷隱張業攻城益急朝廷力不能制公嬰城拒守至食盡援絕城陷迺先沈其孥於井而身與俱斃當是時賊勢方熾或命生畏死甘就執辱或迎風就降者何限而公獨毅然以死自守凜凜忠節萬世而不泯彼腥而此馨彼穢而此潔不待議而後見歐陽公五代史傳死節者二傳死事者十有五乃列公於十五人之中雖於公之忠義若未盡白至晦菴朱子作史綱目長興二年春正月標孟知祥兵陷遂州唐守將夏魯奇死之可以繼素王之直筆豈可謂無公論耶初贈封太師齊國公祠郡治之後圃錫號忠節民以出入為艱更度地於城東瀕大江建祠易號顯節江水暴漲牆壁頽圯史卜地於城北今旌忠廟是也廟之額凡三易而公崇封王爵名節愈著神之

樓凡三徙而吏民祈禱祀典愈隆其所從來尚矣
然而廟歷歲久上雨傍風日入於壞至正九年秋
七月京兆王侯脫脫來守是邦課農興學民俗於
變一日進謁廟下徘徊顧瞻喟然嘆曰聖朝屢下
明詔凡忠烈士之祀官為修其祠宇今廟貌若此
怠而弗葺咎將誰執於是首割已俸偕僚佐議撤
其故壞而一新之次年冬會監郡伯帖木兒自京
師來赴以敬以信議亦克合錢以給計竹以箇計
木以章計與夫士民欣助百色之費命醫正王丈
德掌其簿州胥劉氏龍司出納幹人趙子成張天
祐董役夫當其撤殿上先椽朽腐忽墜塵神座咸
謂神像毀矣及發掘視之儼然無毫髮損莫不驚
異功遂不勞而辨昉於至正辛卯春成於至正癸
巳冬廟復新矣率士民具牲酒以落之仍遣吏請
記以刻諸石夫神人之理一也書稱山川鬼神亦
莫不寧詩列懷柔百神之頌蓋神以祠而知人之

敬人以祠而知神之靈神之得安其棲亦猶人之得安其居也今歲幸有賢侯獨能明於事神治民之道上以答靈貺下以副具瞻一舉而兩得其過人遠矣故書以歸之并為來績政者之勸云

尚佐均吳道子畫聖像記

先聖為魯司寇時像二本其乘車而羣弟子從

者號曰圖立而先師侍者號曰小影世人求合荀卿所謂如蒙俱轉失其真乃摹小影於石而鑿之壁夫聖人蓋有不可以見見而聞聞又況以像求耶然學者緣貌觀其道緣形觀其天或有所得云

明張衍忠孝祠記

漢晉之臣卓然以忠孝見於世者蜀有廣陵太守張綱在順帝時以

危言直道摘梁冀之姦漢中太守李密孝心純篤終養祖母不就晉武之召即夫兩賢之心忠君愛親精誠剴切貫於金石通於神明是豈矯情干譽而為之者百世之下聞其風思其人猶足以興起

良以有關於綱常世道耳嘉定古犍為今眉州彭山縣北里兩賢之墓俱在焉昔人因是而祠之題曰忠孝燬於兵有年矣洪武六年冬按察司僉事天台戴文信按行是邑得宋時斷碑其事跡可考因語邑大夫士以兩賢節行炳耀今古若等盍修復故事維風勸俗即與鄉老同構堂及門廡列恒壙備祭器樹竹衆樂為助凡三月而成其堂階炳煥軒戶明敞江山烟雲之態度森羅輝映出自天象而規模氣概甚殊往昔僉憲以刻文示後為請余嘗慨漢末政紀失馭順桓之際梁氏擅權當時莫敢言議其非張廣陵獨奮然効大將軍無君之罪以彰天憲蓋其心知有其國而不知有其身可謂盡於所事矣既而為冀所陷出守廣陵廣義明信單車降張嬰等盜南郡以平及卒嬰等服罪歸葬築墳此又功德政理卓然過人遠甚抑使世之嘿嘿取容苟祿以逢其君者知所媿矣嗚呼賢

哉若李漢中密當晉武平天下之初威行海內方
銳意求賢以洗馬召在他人必俛首奉命無敢抗
君獨從容表陳其情雖迫以嚴命終不可奪是蓋
親親供其子職不計外之輕重使世之僥倖利祿
苟進以遺其親者知所鑒矣嗚呼賢哉然兩賢之
事詳諸史余特以忠孝非殊故為臣子者義之至
仁之盡以之事君事親易地則皆然且古者鄉先
生歿而祭於其社聖朝以忠臣烈士咸致祀典憲
僉才識明粹熟諳憲體能以名教為先務是舉也
將以引忠孝之化立懦敦薄為勸非特一鄉一邑
而余喜其有志於綱常世道冀其他日登用以裨
國家之政其施設遠大蓋可徵於斯故為之書洪
武九年三月中吉奉政大夫四川等
處行中書省參知政事河東張行書

陳南賓景山曹侯開道濬川記

梁居荆揚上流其
山連峯接岫道狹

僅容足其難如登天行者或四步五步六步七步
乃止憩焉氣促汗流竟日不一二程山谷之水會
而為川奔悍奮擊篙師一失舟楫不可復救羌人
憚於輸貢商旅怯於往來而拊膺之歎鏗嶂之意
所以不能已於李杜之詩之感也然自有天地即
有此山川不知其幾千萬年禹治洪水別九州第
梁於八岷嶠之既藝沱潛之既道蔡蒙之旅平和
夷之底績功無以加自時厥後若五丁之開峽李
冰之鑿山亦足尚矣景川曹侯承天子命來蜀以
開道濬川為已任凡東跨永寧西抵松茂南接雲
貴北連棧道分方命官指畫規畧曰某水也若是
而導之某道也若是而闢之某石也若是而鑿之
其思慮皆出人表官屬奉命惟謹經始於洪武辛
未訖工於壬申中以農事輟者凡三月四塞之險
官屬各有攸司而永寧建昌則又險之險者侯親
視之運巧思鑿巨石通河道為灘者一百九十有

三運土木塞險阻以取直徑為橋者五十有四故
至雲南大理西番箐原其驛鋪皆堅固鎮密不為
一時苟且計其用心亦勤矣既而西北皆以成功
告悉如侯指於是輸貢者無難色往來者無愁歎
聲使李杜生於今日豈無詩歌以美之哉噫人情
可與樂成而不可與慮始當侯之經營也衆莫不
曰蜀之險阻天造地設自開闢以來未之或治今
茲之舉無異於愚公之移山也徒斃民耳惟侯不
惑於衆人之議而決諸一心躬任其責雖祈寒暑
雨不避以八月之勤勞而成千百年之利益智者
之所未為人固不識則聖皇之所特命而責成者
夫豈偶然之故哉宜勒諸堅珉以示來者侯名震
鳳陽人

方孝孺學孔齋記

陰陽之氣運乎兩間物之有形
色者莫不資之以自成而是氣

也木嘗為之加損三辰之明也五嶽之崇也四海之廣也百川之流也皆得乎氣之大者也豫章椹楠得之以為材麇鳳龜龍得之以為祥虎豹犀象得之以為威黍稷稻粱麻枲桑屨得之以利萬世力者得之以負重致遠靈者得之以司晨紀候而天翹之類蠕動之倫非得乎是則不能有生其化可謂盛矣而運行不息者曷嘗有古今之間哉孔子之道亦然知者不得之則不能成其知勇者不得之則不能成其勇賜之辨求之藝偃與商之文學苟非其有得焉則不能其名而凡遊乎聖人之門者皆有聞乎其一二而聖人之道固自若也豈惟當世為然千載之後得其全者為大賢得其正者為君子得其偏者猶不失為善人明乎春秋者得其斷明乎易行者得其中明乎詩書者得其正明乎禮樂者得其文無得焉者過焉而為莊周卑焉而為申韓悖焉而為小人具視聽而備人之形

者孰能舍斯道而自立哉故庶人舍是則長幼乖
大夫士舍是則職業墮為將相舍是則無益於國
而禍及之為南面之君而不師斯道則無以施德
澤於衆庶著顯號於無窮由周漢而來得孔子之
道以為君者視其治功可攷矣帝者得之為文景
為明章為太宗為仁宗王者得之則或卓然為宗
英或知為善之可樂是皆有絕人之姿高世之識
故為知所務而卒有成雖所得未能盡乎大全然
皆聖人之徒也以臣觀乎蜀王殿下其聖人之徒
而得其大全者乎殿下資稟甚高而務學甚篤聞
道甚早而力行不怠明足以照萬里而不底於太
察才足以綜萬事而行之以無為德度之懿煦乎
陽和之溫也問學之博浩乎寶藏之富也學古之
士有一於此皆思自附於聖賢而乃處之以謙虛
守之以畏慎檢身進退恒若不及而於恤民濟衆
賑災施患之事孜孜為之使遇孔子之聖而師尊

焉所得豈可量哉問問羣聖之道因以學孔名殿
側之齋命臣記其說夫孔子之學當世之學者皆
知之求其善學孔子之道者雖古之君子或病焉
非孔果不易學也竊取其偏而不求其全以名求
之而不知吾身之可以為聖賢者衆矣孔子所以
與陰陽同其化者固足以陶鑄百王而範圍三代
其言見乎經者人之所能識也其事本諸心者非
學道而有得者不能也殿下既有得於斯道矣而
臣何言哉雖然得之固美也而守之難守之固難
而不變其守推以及物也益難先乎孔子而得斯
道之大全者莫如堯舜文王學乎孔子而得其全
者莫如顏子堯舜之欽明恭己文王之不顯亦臨
無斃亦保顏子之克己復禮服膺不惰大聖大賢
之守斯道也豈有他術哉亦曰敬而已敬者所以
成夫仁而已矣仁為衆善之原羣德之長而天地
之心也得此以為人則人道盡得此以為君則君

道備孔子之聖豈能加毫末於斯乎故為人而不學孔顏之學則不足以為人為君而不以堯舜文王為準則為失君之職自孔子以來十有餘歲矣知孔子者多不獲居大位而富貴尊顯者往往不被也夫以殿下備顏子所有之德而居孔子所無之位敬以守之仁以行之至於愈久而不變固所優為者惟至仁以治國俾人人謂居大位學孔子而得其全者自殿下始以一洗往古之陋豈非天下後世之幸也哉

胡廣神木山祠記

皇帝統御天下愛養黎元恩惠優渥首飭有司毋擅用一夫取

一材於是生養休息日庶日富比年歲登民和海宇熙洽迺者永樂四年秋詢謀於羣臣曰古者建都必營宮殿朕肇北京恢弘舊規以永貽謀顧興作事重惟恐煩民然不可後羣臣僉曰陛下慎恤

民力視之如傷而民皆樂於趨事皇帝曰爾往試
哉乃用命入山以伐材焉用民力十取其一給以
廩食歸其傭直而民忻然鼓舞不知其勞故事不
程督而集工部尚書臣宋禮取材於蜀得大木於
馬湖府圍以尋尺計者若干踰尋丈者數株計庸
萬夫力乃可運將謀刊除道路以出之一夕木忽
自行達於坦途有巨石巉然當其衝夜聞吼聲如
雷石劃自開木由中出無所齟齬夜越險巖膚寸
不損所經之處一草不掩百工執事顧視謹詳踴
躍交慶事間廷臣稽首稱賀謂聖德所致皇上辭
以弗逮推德於山川草木預有喜色鮮澤榮華蔚
然穠麗及祭之日先降微雨灑滌游坩俎豆既陳
羶薌胙蟹黠雲脩消天宇澄湛明星煌煌月影交
輝祥飈徐來神用俱歆聞山呼聲者三震動天地
神顯其靈於昭有赫遂封是山為神木山詔有司
建祠歲時祀享以答神貺命臣廣為文以紀其事

刻之於石臣廣頓首受命仰惟皇帝功德高厚比
隆天地妙運一心幹旋萬化陰陽鬼神隨機應動
聰合無違故凡有施為嘉禎沓至是山川之神協
贊禎符宣暢明靈濯濯洋洋休有烈光超卓物表
有不可以知巧測量之者然以理求之具可知矣
夫充塞兩間者鬼神之功川泳雲游日暵雨
潤風霆鼓動寒暑更迭歛陰忽陽變化揮霍其迹
尤著然三辰順軌雨暘以時景星慶雲和氣充溢
斯皆一心之所感召若夫木石非由人力不可以
運動而乃潛闕默輸實由聖德感孚神明協應之
所致也固非耳目聞見可知已夫人之所不知不
能者鬼神之所能也以人之所不知不能而測夫
鬼神之能宜其有弗知也况凡天下名山大川奠
於方域之中出雲雨產材木以資於國家其神固
靈也神木之山所產良材自萌蘗而長以至於拱
把連抱神之衛闕呵禁以待於今日然則神之效

靈者非一朝一夕也今茲之顯應所以兆皇帝萬世
悠久之徵則神之功其可少哉稽之於傳凡有功
於國家者必有祭神功彰著實為偉茂載之祀典
於法允宜臣廣再拜謹書其事為記并係之銘以
頌歌聖德且以丕揚神休銘曰皇明受命統馭萬
方六合泰寧物又民康端拱垂衣無為而治蠻貊
荒服蟻附而至休徵之應如川如林至和感孚百
靈俱歆壯哉北京龍飛之所帝用貽謀大啟厥宇
慎恤黔首咨詢在廷庶民子來於始經營皇帝有
詔取材於蜀神木之山岷峩是屬榎楠豫章黎之
百圍神用呵閔以需於茲斧斤斯入林披薄斂凡
厥所產悉呈弗掩良材芘芘孔曼且碩載而輸之
萬夫入駱層巒峭壁轟轟尊崇深谷吟呀飛流怒
淙有巖厥途其石截業徐步曳武猶慮偵踏方謀
平險憑虛架梁人力未施木忽宵行越澗踰壑砰
磕如雷巨石斲礧隨闢以開維山有神維神昭靈

默驅六丁祐相聖明神衷顯宣嘉禎斯應以兆皇
基萬世永盛報神有典祀事孔宜爰作新廟歲以
饗之醴清牲膾籩豆靜潔穀核維旅羶蕪有餼春
蘿蔚陰秋菊垂芳裸薦以時禮儀有章執事駿奔
秉虔以對濟濟蹌蹌罔敢或懈神之來享驅霆駕
風翳以鳳凰騶以虬龍靈旂揚揚神既降止鼓舞
鏗鏘神醉以喜神來宅茲時雨時暘春此邦氓易
泮作攘皇德同天幽明畢被創制神祠以誌神祀
礪石刻銘茲山實侔
頌宣皇德永著神休

黃淮蹇忠定退思齋記

少保吏部尚書蹇公名其
燕休之所曰退思以予舊

嘗同在外制相知為深而以記見屬今之為軒閣
齋室者往往託趣於雲山泉石華竹禽魚公獨以
退思為名其度越於人遠矣夫天下事物之理至
著之中而有至微者存况夫是非得失屈伸取舍

千變萬化所以困心而衡慮者非思莫能究其極而適於中思而謂之退者進非不思也特退而細繹者審加致其詳云耳譬諸水鑑演漾蕩激則鑑多失其真待其波靜水止而鑑焉則妍媸具見故進而思不若退思之為得也且世之人品類不同而所思不能無異農之思易田疇工之思利器用賈之思較贏縮趨便巧以求逞其欲而已士君子立身行道其所思宜何如哉然仕有大小而所思不出其位猶農工商之不相為謀宰執大臣以身任天下之重其所思則志其大而謀其細緩其末而急其本是故禹思天下有溺猶已溺之稷思天下有饑猶已饑之伊尹思致君為堯舜之君致民為堯舜之民周公思兼三王以施四事其有不合者仰而思之坐以待旦見於傳記者章章如是少保公之退而思者同乎否乎公為人寬厚和平沈靜寡欲言動有常度歷事太祖太宗垂四十年人

無間言今上皇帝倚任益隆決大議臨大政不動
聲色而人服信能以禹稷伊周為心者矣或曰公
之退思云者取退思補過之義子言博而不切何
居曰然予所論皆公職分當為之事方今朝廷清
明海宇寧謐聖天子既以二帝三王為己任而為
大臣者又以禹稷伊周自期由是禮樂彰而法度
振道德仁義之澤洋溢乎四表不惟無過之可補
以求底於無思無為而後已顧不偉歟拳拳愚忠
盖有望焉
是為記

楊溥蹇忠定承恩堂記

皇上一嗣登大寶嘉念蒼生
期底雍熙圖任老成人彌

綸治化少師吏部尚書蹇忠定實為之冠宣德七
年秋詔有司畧曰予有輔臣粵自先朝偉著德望
暨於今啟沃居多予於庶政咨焉子於庶官審焉
克允克諧實惟其人欲新厥居以稱予優禮之意

其繪圖以進明日有司以圖進弗稱又明日更為
圖進弗稱上乃自規畫授有司乃卜地於都城東
南厥位惟陽厥土惟剛棟材於肆厥木惟良厥石
惟貞陶瓴惟堅乃卜日之吉鳩功並作裒高以平
築虛以實引繩縮板以垣厥周乃建厥堂翼之以
室乃闢厥路重之以門甃之甃之塗之沐之不踰
月告成祀先有廟禮賓有館庖有厨汲有井有庫
有廩以儲以牧輪奐成美百用俱備復命大臣燕
飲以落之肴核酒醴咸出大官公謂翰林學士楊
溥曰昔晉獻文子成室諸大夫落焉當時善頌善
禱者見稱於君子子何以語我溥不敢以不敏辭
乃酌而祝曰惟天祐國家乃實以賢哲簡俾平格
復錫以壽若周之畢公策名文武之世相成王相
康王永光周室公歷四朝進位師保享高年輔聖
天子丕隆太平之運溥於斯為國家賀又酌而祝
曰明盛之世惠歸之德君子享多福而民咸樂其

樂是以錫馬蕃庶晝日三接乃惟康侯溥於此為
天下蒼生賀又酌而祝曰福善之報惟有德於民
者為盛古昔名臣輔君致治實功允德乎達神明
身被光榮澤流子孫與國同久詩曰惟其有之是
以似之溥於斯為公賀公酌而復曰聖天子之恩
篤不敢忘子亦可謂善頌者矣謹名其堂曰承恩
堂請書此
以為記

羅洪先戰馬記

王夔州公禎濟陽公孫也濟陽死
靖難公死賊獲贈於朝任一子廣

吉水稱忠義家莫過之至其戰馬事有足為世戒
者始公以太學生除夔州通判纔五月會荆襄賊
石和尚流劫入夔焚巫山縣治是時同知蘇州王
某授牒捕賊性柔怯而險猾故托疾不敢出一兵
公忿忿面數之曰汝食朝廷祿所主何事忍委赤
子餓虎口耶即代勒所部民兵晝夜行至則巫山

已破賊方聚山中索擊之殺渠桀三十三人餘盡
遁乃行縣撫傷殘招潰散久乃得歸居三日賊復
劫屬邑大昌促王王又不行而翟塘衛指揮曹能
桀成兩人與王素黨結避禍多方詭辭庇之且激
公曰誠為國家出氣力肯慨然復行乎公即聲應
曹桀兩人故酌酒賀更許以身相翼實為脫王計
公即日勒民兵挾曹桀兩人赴之與賊夾水陣已
而麾民兵軍渡趣戰曹桀望走公陷圍中自寅及
申人馬疲誤入淖田不得脫賊欲降之公大奮罵
賊怒以刀斷其喉及右臂墮淖中馬逸去成化丙
戌五月九日也始公赴大昌道宿木商家商故新
淦人且稔公知賊不敵不敢言是日將歸有物嘯
於山者商驚祝曰為王公耶果爾當三嘯止如其
言商密與家人負簣往尋亂屍見衣白紗半臂者
公也載簣上令不深沒自死所至府三百餘里馬
奔歸門闔長嘶蹠其肩若告急狀守者納之血淋

滿毛鬣盡赤衆始駭公已死而賊尤不解後死之
二十五日子廣始隨木商往殮之而如生不以暑
腐然貧甚不能歸蓋售行李與馬為資而王意在
馬不償值竟徒手得之櫬既行距殮之二十五日
夜將半馬哀鳴特異王命秣者加筍豆不為上王
疑秣者給已自起視櫬馬驟前嚙其項不釋口久
乃得脫復奮首搏胸仆之地不省人事翌日嘔血
數升死賊既平有司核功罪曹柴亦被譴嗚呼自
昔相傳義馬事不一二皆言臨難相濟也若辨讐
怨微隱間切齒碎膺期在必報即在人猶且難之
豈公忠義之氣通於鬼神有使之然哉彼欺人不
見中以機既得自全復利其所有此其計深秘也
然卒不可逃若此世嘗言至靈者人畜之至賤宜
莫犬馬若也銜轡所制鞭策所驅固有衣冠介冑
所不逮者至於施報反覆巧發間值竒崛變怪反
出於貴賤靈蠢之外是孰為之主而一不少錯嗚

呼可不畏哉可不戒哉公志狀載此事不盡情實
公之孫鑾嘗灑涕言之余疑未信後十餘年始得
實為之記而鑾死已久則授鑾之
子植用補狀志之畧以告世人

林俊三功祠記

正德庚午予起征藍道夔下關所
謂白帝城者問其祠公孫述也予

曰越矣哉非鬼之祭也古者慎制祀以為國典無
謂加典為非宜况賊而神祀之倒持網常茂名教
乃爾可慨矣方述起成都以輔漢為名乘亂稱帝
馬伏波見而少之曰子陽井底蛙耳故不受偽命
專意東方用能佐世祖立功異域為中興名臣而
述竟漢賊以死述可祀他日藍馱亦可祀亂賊之
臣亦何憚而自沮耶嗚呼世道大闕也政而系之
教焉淫祠之當毀其有先於是者乎嘗怪述生盜
名器既誅死猶土偶南面謬竊血食者千數百年
少陵東坡徒寄春秋之筆而諸葛武侯張忠定范

忠宣輩任是方猶未及是正意者將有待於今耶
固世道者之責也既命毀其像易其額焉正所宜
祀者土神江神而伏波亦與焉昔共工氏之伯有
九有也其子后土氏能平九土故祀以為社書曰
宜於冢土下闢雖一里之社土之民其世依以生
也川澤以出財用而祝融元冥河伯江瀆具在祀
典潞公所修益州江瀆之祠故在也書曰望於山
川闕又江之襟喉民寄命至要也皆蒙被功德所
宜報而祀而以告以祈又胥聚於此若乃炎精中
微奸偽移柄當是時述能如援擇漢曹以自依則
述將與賈鄧等伍望蜀之萌何自起蜀之赤子何
名為從賊浮橋覆溺八百之慘亦何因而至哉述
名教罪人貽蜀人之禍至於今為烈也故毀述而
進伏波與順也亦祀典也嗚呼君臣天地之大經
也亂臣賊子人人得而誅之無赦者況余叨討賊
之權者乎植人心扶世教毀賊述之祀以聲討藍

之端道之大闕若
此無謂然乎哉

劉丙忠義祠記

忠孝士君子立身之大節隨所遇

無憾不可得也管仲三戰三北謂其有老母孝矣
如國事何溫嶠志復中原絕裾而去忠矣如老母
何仲吾不知嶠則終身以為恨是二者可容心於
其間哉吳君伯陽諱景由進士累官四川按察司
僉事常奉其母以行飲食必親嘗非公出旦夕不
離側母高年安甚乃正德五年蜀寇暴作斬刈人
如草芥郡邑望風塵走盡空君偕部使俞君巡東
川南寇卒至江津江津密通川南非隸地俞君傾
君何如君曰斯豈愛身擇地時耶即率民兵守江
津賊絕江攻城累敗去復盡其黨連晝夜合攻益
力君腹背受敵竟遇害垂絕呼聖上者三老母者
三乃仆君既以身殉國而猶不忘其母可哀也夫

賊入城大掠於羣屍中得君面如生始知君死賊甚悔懼買棺斂君設祭而去其不能長驅入蜀者以君扼其鋒也江津人痛君如父母朝夕悲奠俞君且疏其事上惻然詔贈君按察副使歸其喪賜葬祭如制官其子一人為百戶構其祠俾廟食江津從民欲也逾年予叨左轄泣蜀為君痛之未幾俞君期亦滿特以所為祭君文授予索文豎碑以示久遠時廟未告成予復改官匆匆弗及也今踰三年江津諸生於予舊有一日之雅累申前請予竊嘆世之人平居侃侃凜然不撓視一世人若畫出已下而人亦輕信之不疑然一遇尋常投遣係重輕於顰笑輒顧卻推避反覆擇而後從況於死生大分能決以義如君哉其為人槩可知矣君平日倜儻高邁不留意細務而其所樹立卒表表如此豈其所養者大有所不屑歟又幸遭逢聖明膺此殊典得祿以終母天年而顯揚於無替則君之

心於忠孝皆可無憾矣其有補於名教豈淺淺哉君余邑循令義當有述於俞君不可虛諾諸生亦以義請也故廟成之詳皆不及書書其大者以風示為人臣子當知所重焉

劉春東坡書院記

距嘉州東涉江而北不五里為龍泓山其巔平衍四曠有洗墨

池焉池上有魚化龍宇正統戊辰州人東山居士劉公洪禹者博雅君子也登山見之謂與左爛柯巖洞字筆法一律爛柯巖洞者東坡墨刻也因憮然曰東坡眉人眉與嘉接壤公嘗曰天下山水在蜀蜀之山水在嘉州此昔為公潛隱之地遂創為屋若干間肖公像於中而名曰東坡書院後募僧居之以給灑掃奠獻之役令其從子肅敬之子節介之請書其間成化丙戌敬之舉進士累官御史今為夷陵太守政化大行而東山先公已棄世介

之時至其院見其堂室已風雨浸損日就傾圮僧
之事者弗度乃愀然曰此吾先君子所以表先
哲引後賢之舉也不可使鞠為榛莽如前因加修
葺而嘉州太守永興曾執初公見之曰是吾責也
乃相成之而黃門章君世奇適至曰不可使無所
考於將來屬余為記夫世之賢豪英哲其風聲氣
烈俊偉不拔者在當時多屈抑折挫然其實有諸
內則其名亦隨之至於久而益振矣若東坡初應
制即以文章妙天下歐陽子見之曰吾當避此人
放出一頭地宋神宗讀其文必歎曰奇才然而自
筮仕至歸沒四十年立朝者前後不滿一載中間
因事立言因地見功挺然不羣而亦以此賈禍崎
嶇嶺海而卒不變蓋其在朝也不知有其身其在
外也如在朝而忠義之節夷險一致故雖未嘗終
其身立於朝廷之上而其風聲氣節使人感慕慨
嘆以為不究其用百世而下仰其名誦其文章論

其世思欲見之而不可得則從而考其遺跡以表章之如見其人使有所興起焉况其過化之所乎此東坡書院之所由作也嗚呼是豈非實有諸內者耶觀於是則君子之自處惟求其是信之篤行之力固不必以一時之得喪置忻戚而尚友者亦未可以成敗為進退也余懼州之士藏修遊息於其間者跡其事而惑焉因告紀其書院之成若太守之清慎好古樂成人之美以勵風化而介之汲汲繼述先人孝思不忘尋將啟厥後之科第雲仍者咸潛修於斯也是皆有可書也

安磐嘉定州城池記

吾州介山水中西北刊山為城東南瀆水而堤堤即城也

城東一水自北來曰江水城南一水自西來曰青衣水自西南徼外來曰沫水三水皆迅急皆會州東南皆能為州城患而沫為最夏秋之交常平城秦李冰鑿離堆以避其患唐韋臯鎮蜀時伐凌雲

以殺其怒宋麴紹作斗門以走具暴凡以節茲三水也嘗聞之父老云永樂中州學在岸南數十步以今計之正當中流決鬻遷徙可知矣正統中郡守段公鑑防以杉柵成化中郡守魏公瀚障以石堤自是乃得不徙州人賴焉者數十年歲久而木朽石傾而地削州人於是復有憂色正德六年安成胡侯準以能名自維摩移守茲土屬掠賊亂東北重以內水之變州縣戒嚴吾州人之可憂者又有出於三水之外侯時調集兵餉日不暇給乃別駕秦隴胡侯縉宗奉檄修城城立而盜不敢近別駕升秩去雨水壞城十六七侯曰子辱守土其可使茲無城乃謀父老及大叅童公瑞侍御徐公文華暨磐曰子將城矣又曰自用兵來所在皆城然輒壞屢役不止子將城焉而俾可久又曰州人病矣公帑有金儲倉有穀子惟藉其力焉童公而下咸曰惟侯幸惠我嘉人乃上其事總制少保彭公

澤巡撫都御史馬公吳巡按侍御王公鏜方伯胡
公宗道大叅邵公賁少叅盧公綸僉憲郭公東山
悉從侯議而郭公主張助成爲尤力侯乃率執事
者天之神曰必期率事無踈緩乾沒者有幽罰八
年仲冬望日始事掘地深八尺萬杵齊下砌石厚
凡八尺以附於土編柏爲柵以附於石柵之外仍
衛以土石自柵而上東城高凡十有四尺南城高
凡十有六尺厚則以漸而殺上置女牆高凡五尺
延袤凡六千餘尺凡石必方整合石必以灰一石
不如意者雖累數十石其上必易如其令者賞違
者罰人人感侯之義莫有毫毛苟且爲心者功半
大水卒至叫跳衝擊漫漫者三日州人相視失色
既水落城石無分寸動移者民益歡呼牽引赴事
或至夜分重以灋陽汪侯儉受侯代至亦相與成
之於是茲城凡八閱月而成其西北二方之未城
者則汪侯之任也四方來觀者咸曰壯哉斯城未

見也父老曰段侯以木魏侯以石胡侯實蕪之城如是焉世世夫何憂且侯用財當而運謀審待物誠而集衆患又能不畏騰口成茲大功不可不記以垂無極因以委磐謂侯在州之政皆可書而茲其大者故記之

王守仁平山書院記

平山在鄧都之北三里今杭郡守楊君溫甫蚤歲嘗讀書

其下鄧之人舉進士者自溫甫之父僉憲公始而溫甫承之溫甫既貴建以為書院曰使吾鄉之秀與吾楊氏之子弟誦讀其間翹翹焉相繼而興以無忘吾先君之澤於是其鄉多文士而溫甫之子晉復學成有器識將紹溫甫而起蓋書院為有力焉溫甫始為秋官郎子時實為僚佐相懷甚得也溫甫時時為予言平山之勝聳秀奇特比於岷嶓望之巖厲壁削若無所容而其上乃寬衍平博有

老氏宮焉殿閣魁傑偉麗聞於天下俯覽大江烟
雲香靄暇輒從朋儕往遊其間鳴湍絕壑拂雲千
仞之木陰翳虧蔽書院當其麓其高可以眺其遠
可以隱其芳可以采其清可以濯其幽可以棲吾
因而望之以含遠之樓墊之以寒香之塢揭之以
秋芳之亭澄之以洗月之池息之以棲雲之窩四
時交變風雨晦明之朝花月澄芬之夕光景起忽
千態萬狀而吾誦讀於其間蓋冥然與世相忘若
將終身焉而不知其他也今吾汨沒於簿書案牘
思平山之勝而庶幾夢寐焉何可得耶既而某以
病告歸陽明溫甫尋亦出守杭郡錢塘波濤之洶
怪西湖山水之秀麗天下之言名勝者無過焉噫
溫甫之居是地當無憾於平山耳矣今年與溫甫
相見於杭而疊疊於平山者猶昔也吁亦異矣豈
其沈溺於此山果有不能忘情也哉溫甫好學不
倦其為文章追古人而並之方其讀書於平山也

優游自得因將發為事業以顯於世及其施諸政
事沛然有餘矣則又益思致力於學問而其間又
自有不暇者則其眷戀於茲山也有以哉溫甫既
已成已則不能忘於成物而建為書院以倡其鄉
人處行義之時則不能忘其隱居之地而拳拳於
求其志者無窮已也古人有言成己仁也成物知
也溫甫其仁且知者歟又曰隱居以求其志行義
以達其道吾聞其語矣未見其人也溫甫殆其人
也非歟溫甫屬予記予未嘗一至平山而平山巖
巖之氣象斬然壁立而不可犯者固可想而知不
異於溫甫之為人也以
溫甫之語予者記之

焦維章遊青城山記

成都之西名山山水而縣者以
十數而灌勝灌之山以百數

而青城尤勝時嘉靖二載季春三月予友馮子廷
器論於衆曰青城之秀甲於益州天倉諸峯左右

森羅削壁嵒巖望之蔚然其翠欲滴予田於其下
故能詳也諸君其弗靳於遊乎予將披石穿雲候
君於青霄白石間亦勝事也予乃偕諸友刺舟渡
江行平沙中極目百里漸進山下一時林壑之美
已覺勝絕取道馬橋掠牛心山出橫山之下有小
溪環崖而東可用灌溉以岸善崩水輒泄前令績
溪胡公使鑿之因崖為岸民至今便焉始信循良
之不負吾民如是也為之嘆美過橫山折而西至
石佛灣田皆膏腴水四時不竭又折而西登小丘
土地坦行林谷迤邐望青城山長生觀等處尚在
翠微烟靄間問諸路人始得還北走里許有二衲
持瓣香道傍迎之乃羅家菴僧也菴之所在中深
外曲路入幽溪怪石杈牙蹄股相合不可步跳躍
而進始達少馬陰雨冥濛作蕭蕭聲矣急發南行
一里餘雨亦霽比午後憩長生觀觀久廢惟頽垣
敗礎與灌莽同伍大抵物之興廢自有常數請東

坡桓山之記不足慨也由長生觀西北行入山口
山皆排闥擁澗夾路蘚篁翳鬱凡數轉抵建福宮
宮亦荒墟不治其前諸山蒙茸蒼莨望可千仞惟
貧僧數人茗漿不具已而吾友周子良翰趨謁宮
中且攜酒及飯以進蓋吾諸友自灌縣至凡三十
里有奇周子自大樂至行亦三十里有奇且暝不
可前矣遂宿焉迨晚風雨大作且飲且悵以為天
師洞陡絕窮窅而林深泥滑扳躋尤難吾友鮮于
宗中等復決策曰不可止也已其毋首鼠兩端以
貽謝靈運之愧夜分而止厥明已酉飯畢出宮日
光蒼涼掩映雲際為之一快行巨壑間丹壁峻嶒
每劃然大嘯類有人在空谷中酬和者西行崇嶺
蘿磴如立仰首拊膺而上氣息謹屬遠望有梨花
一株燦如素錦云即洞所在也復過上數重道甚
湫隘纔可尺許傍皆邃谷易於墜陷凡行四五里
得至洞下洞在石壁十餘丈上與徑迴殊前令胡

公懸為棧道沿入洞中中塑道陵像左塑唐明皇
像或云偽主孟昶也山之形勝奇峯清淑不可殫
述右三十六峯次第呈露黛色如螺左試劍石等
山遠近朝拱若服於洞之中山而岌然無阿附意
浮嵐往來在我襟袖以及萬彙覽不盈掌天下之
奇觀脩矣然丹竈徒存白鶴不返所謂雲路咫尺
不可以登者歟洞有菴一所有比丘者年可近百
不御酒肉且云牡丹坪朝陽洞去此尚遠乃各酌
數杯下兩腋清風殊覺有盪胸之勢尋建福宮故
道將謀歸路會馮子廷器延飲其家諸友亦醉飽
連日則爽氣方騰塵襟又塞矣大抵吾曹雖鉛槧
之素業未休而江湖之壯志尤甚故太史公必登
龍門探禹穴而後為文豪宥有奇氣朱張二儒遠
臨衡岳其時高邁之懷豈潦倒囂譁者之能與哉
此予於青城之遊
不可以無言也

張時徹六公祠記

成都故有祠祠先代吏之有功德於民者秦李冰氏漢文翁氏

宋張詠氏是曰三公祠其後巡撫林公元甫疏請增祠宋趙抃氏則曰四公祠又其後巡撫王公大用疏請增祀漢廉范氏宋崔與之氏則又曰六公祠云按載記水驚弗經民患魚鼈乃穿渠三十六溉川西南土田凡數百萬頃堰濫導支蓄洩用宜乃又鑿離堆山以避沫水之害恢神禹之蹟而拓陸海之饒則李冰氏之功也謹身率先仁愛好教化以蜀僻遯而邊之狃也飭厲郡縣小吏開敏有材者遣詣京師受業博士數歲成就還歸率以為右職又修起學宮招集弟子為除更繇每出行縣益從學官諸生明經飭行者與俱縣邑慕之爭欲為學官弟子者蜀學至比齊魯則文翁氏之化也俗故尚文辯好相持短長始厲以淳厚不受偷薄之說又民物豐盛廛宇逼側舊制禁民夜作以防

火而吏相隱蔽燒者日屬乃燬削先令但嚴使儲
水百姓便之共歌來暮則廉范氏之政也承五代
之殘弊詰覈禁奸端決寔擊而大要以勅毖風俗
博崇孝義獎德學以為士先他如以米易鹽以給
軍興以賦輸米以行平糴諸所厝畫莫不井井使
朝廷無復西顧之憂則張詠氏之治也貞介絕俗
峻厲自持以身為師丕變風俗始也匹馬入蜀以
一琴一鶴自隨比再至益屏去琴鶴止以一蒼頭
執事至於令人傳其風猶為凜凜則趙抃氏之烈
也寬減征賦篤志為民詔使盡護四蜀之師拊循
將士人人得其歡心增茶馬以實邊備發緡錢以
助糴本邊防屹有攸賴則與之氏之績也茲六公
者為政規畫不同其於有功德於民一也初予之
銜命而來也有祠謁焉瞻其輪奐景其氏名乃心
戚然動又瞿然以思也曰彼誠何人哉予愧矣已
而莫曰於乎吾觀於今而益知六公者之功德之

大也何者民情農自安不服田畝有司曾莫之程也溝渠廢而不穿陂堰壞而不治乃雨暘一或不時即束手改踵而號曰天其厲我乎而卒不免為溝中瘠此其患一也士不聚於庠而聚於市黨爭訟弋貨財否則博奕酒食以遨遊廉恥日薄而德藝不經此其患二也氓所欲也從而奪之所不欲也而復聚之狼戾是逞威休弗卹邱怨讎繁興而逋播日甚此其患三也臧否弗甄井宅罔表行誼者不蒙福奸法者不被誅僥倖之心勝而善良之習孤此其患四也乾沒以竊公藏脂韋以眩衆聽羅網張於公門而誅求徧於節屋位以賄起而來者日競此其患五也士馬之弗閱餉秣之弗經無事則張虐焰以病人有事則望邊烽而褫魄故赤子饜於豺狼而戍居鞠為榛莽此其患六也使六公者之政之修也而有是哉故曰吾觀於今而知六公之功德之大也然而予非其人也誠愧矣誠愧

矣然古有之曰不習為吏視已成事蓋言乎其鑒也矧澤在蒸氓功在史冊炳炳有耀者哉自今而後殫力究圖以無忘夙夜去其不如六公者就其如六公者上以翊吾國而下以鳩吾民幸也樹有尺寸之烈即鴻伐赫勛之不敢期其庶幾哉猶前哲之遺軌手如以名而已也則昔之人且猶鄙薄矧曰其能迪哲又矧曰能崇於彌高其懋哉戒哉遂敘述建祠之意而綴以迎送神詞俾時饗則歌焉其詞曰桂殿兮蘭堂重門兮兩廊璇題兮刻栴宛虹霓兮翼梁辰良兮日吉擊豕兮封羊千秋兮報祀匪今兮伊始耄倪集兮祠之下歌者歌兮鼓則鼓靈之來兮庶幾靈不來兮心怨苦右迎神靈連蜷兮以降前兩旌兮擁幢白馬兮朱纓佩玉兮垂叢容既儼兮禮多氣則矯兮神暢糾鶴兮就向奔走兮夙張曷究兮民思曷極兮靈之貺願少畱兮須臾哀我民兮引望右降神民望引

兮靈不留尸具醉飽兮既裸以酬前騶兮抗節兩
騶兮服斬靈來兮孰告靈去兮孰謀日黜黜兮西
匿風悲鳴兮颺颺鳥雀兮來下泣山鬼兮秋秋
我心兮悵悵歲歲年年兮云疇之極 右送神

新建諸葛忠武侯祠記

天下莫大於義而強有力
不與焉莫效於忠而智計

不與焉昔漢鼎之播也曹操怙梟雄之資以擅中
原孫權席父兄之業以據江左矜尚智力競求非
望天下知有魏與吳耳而昭烈方以一旅興闢
困蹈非有如林之衆與可憑之土也當是時敢有
言相輔以圖大事者哉而侯以草廬寒餓之夫承
三顧之勤乃遽許以馳驅非徒以堂堂帝室之曹
足以聲大義於天下耶已而雲雨既得謀成掌中
光啟雄圖上延絕緒發獻帝之喪討曹瞞之逆義
檄四馳荆楚響應蓋欲首吞鄜鎬尾控伊洛然後
兼吳會而蕩楚越侯之言蓋畧酬矣即其所自施

設拳拳以開誠心布公道集衆思廣忠益蓋為務故
其言曰若遠小嫌難相違覆曠損矣違覆而得
中猶棄敝蹄而獲珠玉也然人心苦不能盡苟能
慕元直之十一幼宰之殷勤有忠於國則亮可少
過矣於乎三代而下有如侯之心事者乎故雖中
道云亡漢紐不續跨有荆益僅成鼎峙之勢薦駕
戎車未收混一之功而仲達生走平立死悲後之
君子咸以伊呂許焉謂智計彊有力者而有是乎
以今觀之張弛協於人情綜核周於庶政斬將覆
軍發無虛舉築室反耕動有成算八陣之圖不刊
流馬之運非古則侯蓋非無智計者故道化行於
域中風聲振於徼外而頌功德稱神明巷祭而野
祝者環梁蓋皆是也語所謂生而正直則死而為
神其然乎其然乎成都故有專祠既以合祠於昭
烈而廢禋谷王公曰侯之功德大矣不專何崇不
崇何稱庸已諸昔孔發如何之嘆詩詠勿翦之思

古今人情要豈相遠哉今夫釋老之宮鬼伯之構
環城以內外轟如也而獨於侯靳之豈所以彰哲
軌而翼休風乎是實在予其何敢後乃請於蜀王
聞浣溪之隙地而祠焉而予竇來代公遂述而碑
之乃其行業之懿則裴晉公之記詳矣碑蓋以昭
蜀王尚德之美與王公興廢之績云辭曰嗟忠武
侯曷躬耕南陽乎曷龍潛於野弗騰弗驤乎曷四
海鼎沸如蜩如蟪如塘乎曷不吳不魏枕高岡乎曷草
廬三顧魚水洋洋乎曷舉世皆霸獨以王乎曷親
吳讎魏曷短曷長乎曷戎車薦駕亶勸乎曷三
分鼎立戰玄黃乎曷信義既布漢炎弗將乎曷將
星告殞中道崩殂乎曷大志弗終以莫不傷乎曷
廟貌尸祝墟落相望乎曷築爾新宮美棟美梁乎
曷鳴鐘吹竽鼓堂堂乎曷踐爾邊豆奠椒漿乎曷
衣裳楚楚以翔以翔乎曷
降鑒我民四國於匡乎

重修杜工部祠堂記

杜工部子美祠在成都郭西五里許即其所詠草堂者

是也蜀獻王之始封也見祠隘且就圯曰是足以妥靈而虔祀乎遂拓而新之在方正學碑中嘉靖丙午乃余實來去獻王幾二百禩則圯猶昔也余乃使知府馬九德長史李鈞游緇啟於今王為言祠事王輒報諾乃遂闢廊廡起薨棟引流為池易梵以石規模壯麗增於故昔蓋十之六七費白金三千有奇經時日歲有奇人曰是舉也見今王繩武之孝焉尚賢之誠焉夙後之烈焉非恭儉樂善其孰能之張時微曰余於子美蓋傷志士之不遇云初子美貧不能自振客吳越齊楚間如長安舉進士不中第困瘼矣明皇饗郊廟獻賦三篇帝奇之稍稍卿用因數上賦頌遂高自稱道且言先臣恕預以來承儒守官十一世迨中宗時祖審言以文章顯臣賴緒業自七歲屬辭且四十年然衣

不蓋體常寄食於人恐一旦填溝壑惟天子哀憐之若令執先臣故事拔泥塗之久辱則臣之述作雖不足鼓吹六經至沈鬱頓挫隨時敏給揚雄枚臯可企及也有臣如此其忍棄之會祿山亂天子入蜀子美避走三川已又自郾來奔為賊所得乘間脫走上謁鳳翔拜右拾遺先與房琯為布衣交琯之敗陳濤斜罷相也子美力辭仲雪觸帝怒瀕死乃免然帝至是蓋不甚省錄矣時所在寇掠子美家寓廊而彌年艱窶嬰孺至餓死已出為華州司功參軍會關輔饑輒棄官去之秦州採橡栗負薪以自給流落劍南結廬成都西郭會嚴武節度劍南東西川往依焉武以世舊遇待甚隆因表為參謀檢校工部員外郎而子美傲誕嘗兒侮之會武卒帳下亂子美遂往來梓夔間已又出瞿塘下江陵泝沅湘登衡山因容未陽死焉始子美懷奇服異俯視時輩謂功名可立致不屑屑脂韋取容

而逢時百罹瑣尾流離曾不能自餬其口乃竟窮
餓以死也悲夫人之議子美者曰放曠不自檢好
論天下事高而不切今諦觀其詩皆洞悉事理察
知閭閻謂高而不切是耶非耶至其所效用恒以
稷契自許故其詩曰世人共鹵莽吾道屬艱難又
曰勲業頻看鏡行藏獨倚樓此其所自傷悼亦云
至矣使也邁雲龍之會而遭三五之期以彼其志
與才必能以功業行實光顯於時即不能以功業
行實光顯於時乃其所自稱許揚雄枚臯之文協
之金石被之管絃以格郊廟以和神人其孰得而
少之耶何至問闕流落自餬其口之不得而乃竟
窮餓以死也故曰余於子美而傷志士之不遇也
後又有論者曰子美之為人其清類伯夷其忠類
屈原其慮世類箕子於乎其幾矣其幾矣有司曰
祠成矣宜有守祠之田則與守祠者田又曰是宜
有麗牲之碑與春秋饗祀之詞遂叙述子美之事

跡而系之以辭曰江之水兮洋洋發岷山兮導華
陽莽川原兮撫撫雲霞爛兮如繪如組東有濯錦
兮西有浣花都之人兮梁燕曷之親兮沙鷗思公
兮祀公考鼓兮鏗鳴鐘雲冠兮蕙服乘鸞兮駟鵠
公來兮不言公去兮心煩冤醕桂酒兮奠瓊卮生
不及兮心相知翼我兮迪我公不然兮我心則耶
楊慎劍州鐘鼓樓記劍巖州也代為設險庸固封
守厥制宜壯規魏為雄觀而
卑陋弗稱是偷安固陋之過也乙亥夏李大夫壁
來守三年政行民信誕告乃邦曰爾邦之險聞天
下為守理所外扞松維內翼保順北藩羌漢南蔽
潼綿蜀之要害也而塵不滿百家城不及百雉於
制未脩前有鶴鳴後有漢陽左有臥龍四山下瞰
城外高而中窪以攻則易以守則難於法未利昔
在天順末趙鐸一寇隨陷近正德初鄆本怒再寇
又陷井木之堙刊人民之虔劉則斯城之罪也寇

在建瓩我在天寔何以險為守臣司封敢憚於役
況古有址匪我嘉匠若克葺舊貫可以壯一方可
以奠四民可以禦五兵可以利百年邦人同然應
曰善善唯唯歡以承命乃辰告於諸職司咸署曰
宜城事聿興拓其舊而倍之邦人曰吾邦之險昔
獲名今獲實昔險在外不在我今險在我不在外
無寇有豫有寇無畏矣城曠土畫為衢市綏多士
女昔皆寄汲於江托契於樾今有廬井矣交述道
道駕樓一重閩屢嶠雅與城稱四望險固舉在
眺中幸茲無虞烽地析闕我民安堵有歲無苦往
者盛鶴徒驥是擾惟庭閣鐘鼓以嚴啟閉君子承
事朝夕野人作勞息偃咸聽咸聞若警若告昔陋
若墟微令比節鎮矣皆制也非僭也始於己卯七
月甲子考於庚辰八月丙辰既美其奩不愆於素
良役哉吾聞之春秋役罔不書費倍利書譏利費
半畧利詳費利倍費不書費特見利也劍之役是

利倍費者也法當大書而畧費焉於是邦人落之
大夫銘之大夫請之太史氏記之記大者詳焉本

春秋之
義也

江瀆祠記

天子即位懷柔百神南瀆獻官史臣慎
作祠記明天子之績大統先有神器為

百神主嘉靖初元仲春吉日乃肇修羣祀初筮於
己丑原筮於辛丑大昕具冕服御正殿臚句傳遐
致精神四馳上卿洎近臣徧於嶽鎮海瀆古帝先
王先師皇祖諸陵命史臣慎祀南瀆大江恭代奄
贊往監攸沈禮章有眎厥惟多儀夏四月庚辰卜
人練辰有司備物史臣展儀肅將天祝幽贊於神
明舉燿張樂三獻望燎已事乃竣川靈答眎榮光
伏氣旭旭杲杲工祝拜手稽首曰惟明天子不愛
牲玉禮儀具備神降嘏福慎曰是知天咫焉知民
則福在和民和民在善政善政明神依失政民罔

依民曰罔依神亦罔依明神失依淫祀其崇遠聰
明醜正直求諸淫昏厲崇豐昵非糞明神其吐之
愴壬比周忠直其羞之世用彫政用批潤下反行
罔象遂騰灾沴重仍漂邑宮稼叢降戾於茲邦厥
驗惟不遠今天子懋建鴻基成民致神釐正祀典
京邑首觀四方毀石經之廟墮元明之宮淫祀攸
屏秩祀孔明凶人黜伏俊良交慶元元蚩蚩咸蠲
胥感矧曰明神其有怨恫明天子克享萬靈克和
萬民惟明覘幽惟幽相明幽明禮樂厥鑿無岐鳴
呼休哉爾工祝何知秘祝於祈年飾瑞於效珍寶
陋罔聞惟道洽德潤滌瑕蕩穢澤流南紀永我
皇仁無疆之休哉史臣頌烈敬垂鴻休於茲石

歲享旌忠廟記

旌忠廟祀後唐節度使夏公也公諱魯奇守武信日董璋反東川攻

遂州公在圍城中兵食盡而援不至遂自剄死公結髮從軍事莊宗早立懂於天下驅馳中原破勁

燕潰驍魏王彥章號千人敵竟成擒於公手及其
守一隅孤城反受困於僮豎豈非天哉傳曰善死
者不忘公善死矣以身殉城以死勤事忠憤之氣
凜然千載宜其赫為明神廟食一方也歐陽公修
史以死事傳之五代之臣在是列者僅十人耳我
朝敦崇祀典非功烈昭史冊者不與大明會典所
載全蜀合祀之廟七而旌忠廟在焉豈陳寯之光
景動人畏壘之私相尸祝班乎土人每歲孟夏五
日遠近相率虔以承祀祀儀雜用杜鰲未有迎享
送神辭縣人士以為請乃行楚辭國殤之義槁諸
聲刻諸麗牲石用薦歲嘗焉其辭曰炳膺蕭兮挹
椒醕承肝蜃兮闔神宇神之靈兮毅且雄精為星
兮氣為虹著光景兮如在標晴霞兮彤彤神之來
兮霄暖舒披颿與兮英颿噓紛羽遊兮揚鳥旗置
霜稍兮繫雲駒淵淵兮擬鼓噉噉兮陳竽歌振縷
兮舞回裾神醉止兮奄虞虞神之去兮靈澤下雨

靈俎兮霧濛，當我祺兮藩我禧，
頤伯強兮遼肥，
蠶畝兮粟兮箔，委絲函穴蕩滌兮休德流滋，
恢台孟夏兮歲以為期，拜神賦兮神無射思斗城，
金壁兮奠我邦土，我民敬薦兮無絕終古。

房公石記

蓋有天下郡縣歷代沿革不一而名稱隨之

已迷易其處至於吏於土者升沈交代如傳舍然
則又不數十年而弗能姓字誰其矣理也亦勢也
若夫賢者之所歷惠利及物遺愛在人思其人斯
重其地重其地斯紀其蹟思之矣斯久而益深重
之矣斯遠而愈彰紀之矣斯著而不磨故其遺跡
舊址雖在荒陬無人僻遠城市之區後之人不知
所以崇尚而推表之然而思之重之在人心而蹟
之顯者在人目雖問之樵蕪山氓猶能指點於兔
鹿之蹊薦莽之外也是何也栝椿遺書孝子興懷
而兌戈和弓忠臣所以謹陳而不敢忽焉者也例

此以論則夫賢長吏之所在人之思之具有異此也哉故有爰想之棠留珮之亭甚之拜具烏履張其畫像者則凡可以繫其思者宜無不重之紀之矣唐太子賓客禮部尚書房公次律罷相後為漢州刺史鑿巨浸人號為房湖政聲流聞未幾復召入為刑部尚書既去而州人思之所為立石號房公石者也石在州治內歲久寢仆知漢州事盛君慕公之賢而圖所以永係州人之思者復為建亭覆之將以避風日之剝矣苔蘚之侵蝕使繼此而來宦者有所嚮往焉其崇尚推表之至矣亭成寓書於予曰請一言記之房公在唐為名臣開元天寶間以姓配公不名字而可知者房其一也史贊其德器有王佐才以忠義自奮片言悟主柳子厚稱之曰相立宗有勞於國人咸服其節相肅宗作訊於政人咸尊其道其見重於公議如此不幸讒人萋菲用違所長致有陳濤斜之敗世多以此小

之然究竟其事則中人從戰責有所歸擬之荀林父於邲郭子儀於相州不幸蓋頗同焉至後世朱子追論而惜之亦有杜甫之楮為正也使當唐全盛時從容廟堂間所立固當不在張韓諸名宰下推其刺一州而名百世亦其緒餘者耳一石之立於公何有茲石無公題識與當時文刻地幾易名官幾易姓而屹然七百載人有知為房公石者真不係於言之有無也復欲益以卮言亦贅也已昔賢有沈碑湘潭為身後名之慮至遠也然而江未為陵而石已泐峴首片石乃能使見者墮淚而頌之至今蓋有傳在人而不在物其所感在遺愛而不在石也由是觀之漢人之思房公固當與房湖為無窮而亦有不賴於茲石矣然即州人愛戴之誠可見人心之易感與君子之澤之遠盛君復有尚賢之舉出於尋常皆作而可記者也故為書其本事於前而志歲月於後云

陸深大益書院記

嘉靖十有五年丙申冬大益書院告成書院在今四川省城之

東北隅四川古蜀都而益州蜀古名也維我朝聲教暨萬里而四川號稱大藩合今昔之嘉名命之曰大益書院而書院之大者凡以文化輔聖治也與古四書院之制同今天子中興加意文教薄海內外蔚然向風矣而是書院之成適當禮樂大興之後於時四川巡撫都察院右副都御史西野張公瀚巡按監察御史玉洲陸公琳相與落之而顧謂深宜記深自乙未夏來轄蜀司與聞斯事稽諸案牘蓋自正德戊寅歲提督學校僉事王公廷相實始其事即故少師萬文成公之舊寓前為講堂後為燕寢翼以左右之室列為五齋進為先賢之祠樹之門閤統以垣牆於是書院之體位立矣繼之者副使張公邦奇端方指授於是書院之師模具矣士之來學者咸彬彬然巡按御史盧公雍熊

公相助以金五百於是書院之潤飾裕矣巡撫都御史許公廷光巡按御史黎公龍提學副使歐陽公重知成都府劉天澤王遵益以廡舍實嘉靖之甲申歲也巡按御史范公永鸞劉公輔相繼買田於雙流以六百金歲入以四百六十餘石於是書院之居養裕矣副使江公良貴出學道贖金凡四百左右布政使林公茂達按察使許公讚相與佐協以廣門衢之地於是書院之觀瞻偉矣會張公鯤以副使來督學政請於巡按御史熊公爵加葺理焉甲午之歲僉事顧公陽和踵至請於巡撫都御史范公嵩潘公鑑再新之於是書院之基構永矣巡按御史鄒公堯臣以為未足也再檄知府邵經濟拓之潘公申之曰茲惟毋後時凡費重以三百金於是書院之地廢起矣經濟乃具石請書其事以昭來世深按春秋之法最重興作凡始事必書凡終事必書是役也歷年二十經營數公前此所

未有也不大益於蜀乎在易有之震下巽上其卦曰益益之象曰損上益下益之象曰遷善改過夫損上益下政也遷善改過學也學與政通學所以學為政諸生蓋顧名以思義乎學成而出持是以佐我皇朝禮樂之化益之名義於是為大是書院也殆將與岳麓白鹿媲美矣此王公建置之本意而諸公作興之盛心也皆不可以不記其諸牽聯宜書者具之碑陰

張翀中江縣余嶺新道記

中江當兩川雲貴秦隴行旅之衝實劔外劇縣

縣西二十里有山曰高崖壁直雲矗俯瞰羣峯勢與青城大峩伍山之麓故有鋪曰雙魚踰雙魚五里溪水自北下夏秋交輔以行潦其悍滋甚有司者常橋之號曰高橋橋西上數里為鋪曰飛黃鋪之北里曰方基又十里曰走馬自雙魚而上逆坂重現時相勾連巨細石鉞鼎峙蓋蓋行者必擇地

然後可以投步至走馬稍已又所在乏水泉當焉暑時公私往來無以濟渴不死則病循縣西五里出雙魚之北歷兩河口壘洞直距方基走馬之間一徑弦直可通轍跡而少迂回演迤艱難攀跨之狀夾徑有井或寒泉錯出石罅湧溢漫美其聲淙淙所謂井深不食者官道不出於此而出於彼何也新建余侯祺來令之五年不為苛峻之政縣以無事乃屬其土人而告之吾聞道弗不治司空不視塗澤不陂川不梁周單子所以知陳之亡也今官道之利害前人之智非不能及此而不肯一舉手或有意舉手而奪於羣咻憚而不為不智及之而不為不仁憚於人言而不為不勇吾無以令為也茲將舍其迂而就其直棄其險而從其易僉其謂何皆應之曰然遂以嘉靖四年十有一月庚申刊木夷穢鑿兩河壘洞之道而通之下上連延僅二十里廣如故道三之一并徙雙魚飛黃方基三

亭於形勢之便區取南之直以易北不傷於民撤
舊亭之材以為新不費於財首尾兩閱月厥功告
成而縣之人忘其勞途之人始得便周行之安也
兩河當高橋上游十里其患差小乃廢高橋舊址
改創石橋二於其上為橋之空各三橋之陽為亭
一不侈不陋允奕可喜榜之曰仰止以休行役之
士大夫凡所規畫動適人意旌倪歡呼如出一口
按察使呂君道夫適以入覲過而嘉之遂更舊鋪
之名雙魚者曰余嶺飛黃曰平易方基曰便民用
慰山靈而示後來君子於是知余侯之善為政也
予方戍瞿門賒博士李載陽不惜二千里走書曰
願有記按周禮合方野廬二氏皆以道路為職凡
舟車輦互叙而行之不使空闕而月令以季春之
月周視原野開通道路為訓三代之有司治其職
以待四方之賓旅者詳矣蓋秉禮立制而授之官
師細大具舉而纖悉無憾此所以為先王之法非

後世所及也去古益遠士之工於取名者羸誑之
不知而蔽所恃以侈耳目之觀其疑疑者視民之
利害恬然不以動其心媮得避嫌以苟朝夕要之
二者其操心之私均也然則為今之吏能舉事以
貽百世之利非役志以干譽而求益也而民不以
為病蓋仁者之勇矣於先王之法又深得其遺意
雖欲不記可乎侯字原貞宋尚書襄公靖之後丁
卯鄉進士其興學慎獄憫奸惠民之政皆有明法
往歲寧賊之亂潔身以去志操凜凜薦紳間多能
誦之者載陽雲南趙州人及典吏徐朝進皆嘗贊
是役法
得附書

楊瞻四忠祠記

四忠者總制彭公澤巡撫林公俊
川東分巡馮公傑川北分巡王公

源也正德辛未以來馮藍倡亂旗幟千里三省煽
動巴渝果梓之民死亡過半至今越三十餘年田

間父老猶有能道其毒苦之狀者嘉靖癸卯冬余
出按巴州詢其事弟子員李生應麟等進曰巴州
東鄙五里許為長樂太平二鄉地山深林菁駟藍
宵嘯發焉日甚一日勢如火焰維時王公自閩來
促其鋒鋒甚銳追至儀隴城陷公被執焉中一刀
六鎗罵不絕口而歿賊勢益橫至蒼溪滔天矣維
時馮公尾而從之大戰於鐵山關公被縛大罵遂
遇害時朝廷起林公於廢提兵勦之公見賊勢猖
獗遂單騎入營諭以順逆賊望見公皆驚服叩首
羅拜跡稍斂民稍寧既而朝廷特命彭公總督三
省之師公號令嚴明將士用命分人馬為數支隨
處誅戡公麾節大戰於富村斬獲幾盡擒廖麻子
餘黨悉平巴民始安枕矣余聞之喟然曰以死勤
事則祀之以勞定國則祀之以能禦大災捍大患
則祀之四公或倡策滅賊或仗義死節皆其維持
宗社裨補綱常潤澤生靈者也不於此祀世將奚

觀民將奚服同知李君琛學正張君文熙訓導王君大顯僉謂馮藍作變四公遇變弭變皆自巴巴則可祀也於是乃建廟祀之題曰四忠祠云

余承勛修復越舊東路記

越舊當西南夷孔道自漢武鑿靈山橋遼水以

通邛笮厥後孔明渡瀘南征隋史萬歲由石門以通南詔唐韋臯置青溪關以和羣蠻所出雖異而石門青溪則今黎葛扼塞皆謂之南征道也然關梁徙治邊計益嚴故遠人涉險阻犯瘴癘穿番落一綫而路焉鮮弗難且病矣嘉靖己亥冬憲使富公好禮按部黎葛間脩豫之暇察山川險夷寒暑之灾祥凡可幹利害綏遠人者咸經理之弗遺乃謂大渡河古瀘水也孔明嘗五月渡瀘維其時矣濤噴霧禽獸避匿雖軍書驛騎交馳於津垠間亦必俟暑退瘴消而後敢渡河通走集焉相公嶺亦

號自孔明烏道盤空雪霏晝暝俯其中躡箬驚端
諸番每乘以為亂故非哨期則羣百數十人弗敢
過也鴉呼天塹鬼闕動遭不測議邊者顧弗思以
處之何耶於是乎請於當路中丞李公欽侍御董
公珊曰國初景川侯曹震來畧蜀謂是古驛道以
通越舊蓋利其風候宜人番酋嚮順履坦而道里
投爾今廢道之陳跡具在盍圖而治復之僉曰審
邊土利害而趨避之善籌邊者也富公乃命寧越
指揮丁鼈者率諸邊士自嶺西之首塗隨山刊木
緣羅徇之境而東之則斬闕有遺戍絕谿有遺梁
標界而編織種落有遺虜約費省勞故不數月而
遂達於戡眉之麓為通達矣後復程遠通經度宿
衛而嚴夫善後計焉凡為戍堡五曰小菩薩曰黑
麻溝曰一碗水曰板房曰金口為公館四曰舒快
曰老木坪曰羅徇曰射箭坪堡館間置連絡三百
餘里每堡徙越舊衛軍十人每館設馬五匹箭坪

則編我眉民夫五十人擁犄則土民五十人舒快
木坪則各越舊軍二十五人仍各置一人總領之
以防守焉若兵械災饑供帳什器之類所在靡弗
備設有警則聲援相望遠害而蒙近利焉故人樂
趨之至大渡河故道弗敢閉亦弗敢失守若古黎
之南北二路惟遠人審趨避焉爾或曰天設之險
人謀恐未足以勝之是路也乃謂審利害而趨避
焉果天邪人邪不然籌邊之計創始難克復亦弗
易苟易為力而且力焉若臯之治復石門道者天
實相之患後之人畏難無所於述焉爾是故天實
中李白作蜀道難篇以刺嚴武寓天險也陸暢更
作蜀道易篇以美韋臯寓人謀也求之乎美刺之
實則蜀道之難易在人弗在天也人謀弗可以勝
天險已乎富公則臯之儔也經畧西南疏述不閉
治道乃其一端爾故樂
為記之以俟議邊者

劉侃重開金水河記

成都環錦江為池江之丈緯城中曰金水開自宋白敏中

厥後廢興無徵也嘉靖乙丑侃來守是邦閱金水
僅僅如綫蓋水宗於江逕惶以入河其後久堙而
江沮止托源於惶耳又壅闕日增居人利其岸以
自拓河之深若廣纔咫尺雨潦無所歸蜀人患之
明年丙寅春大中丞宜黃譚公以節鉞鎮蜀始至
即周覽錦城曰城外犖錦江如帶而內襟以金水
重績交紐所以翕坤靈緼休氣胥此矣顧帶存而
襟廢豈所以毓厥秀哉心籌之時大足丈羅甫洗
兵而焚道與南詔未靖又飭興都需材棘公方以
敷和叙戎登材釐政為急已而焚蠻遊去其冬十
有二月卯都以南詔捷至而木政罷會公亦晉司
馬總兩廣師以行乃屬侃而詔之曰吾將復金水
之故顧醜其流也孰與溯其源明日丁未公命駕
西循少城步觀於江之上游而藩伯楊公賢陳公

水光臬僉呂公廕暨閩帥張君焰沈君禮判守成都薛君衛知成都令董君石暨侃咸從行公忻然喜曰隍俯金水江復俯隍有建瓴水之勢於形便隍去江不能數武而近分江以益隍河宜自利其事無難便且無難而前修闕焉將以需今耶曰汝閩帥其休三軍閱使穿江作渠而濬金水之堙曰汝太守其西輦當儀東斲龍泉之石固水門以節江之入溝堰津梁悉聽汝便宜曰汝令其刊汝山之木下沃野之竹以為江障明日戊申萬錨具興又明日己酉渠成而江入隍越二日辛亥汰河之壅廣三尺有奇其深三之一而河成匠石各以所徵至為石堰一閘一橋一於其渠壩一於其隍既成公始至金水之漪洋然流貫闌關蜀人奔走聚觀詫其神易由是釜者汲垢者沐道渴者飲統者併澣園者灌濯錦之官浣花之妹雜沓而至懽聲萬喙莫不鼓舞公之賜焉以為天漢之飛注也侃

惟在昔李冰以導江著烈廉范以貯水興謠皆蜀先猷也公是舉似導江而愈於貯水遠甚君子當能辨之矧公之膏澤蜀者不啻一金水已乎而其經綸之畧操易握簡神行風偃悉得神禹治水行無所事之機故功捷而利之溥若此是可以觀智也夫人視官如蓬廬一得代去便視若秦越公於蜀人獨眷眷護持洵若慈母之私其子思貽百葉之安罔不注心弗以去住而異其情也是可以觀仁仁以涌之智以運之公之庇蜀人者深矣噫君子之澤易埤地道之變靡恒安知後之不復如今哉繼公之蹟以永蜀人之庥又俟乎後之君子也匪托之金石無以詔方來於是述其事之所由而勒碑置於江上

任瀚浮橋記

越嶼巖巒幽壑出虎豹獮狢窟穴剗剗離奇輪囷以航清冷不測之淵使

人絕長江如道堂除歷都市不知潤養出風濤上
此非有雄才峻畧彊仁義垂功勞永世如孫叔敖
杜元凱諸人其誰識為此者長江在天地為物最
險嘉陵江出劔南軍負果州東郭而下望之潯漢
張天名激玉灘者又荆吳梁益通津中流崑崙多
怪石夏秋水盛時石隱不見漫然且成安流至霜
降水落則乃衝薄震盪槎牙怒號過人瞬息失便
即舟敗覆沒不救下為魚龍餌食莫有出者故篙
師往往據舟揖抗臂指頤邀取長物以困行路乃
嘉靖癸丑春郡太守南山沈侯謀諸叅佐東即鶴
鳴山下西距長隄麓石水步外各植華表相對峙
貫以絳綯繫橫江舫百數十艘版其上施蓬蔭為
閣道以通輿馬往來無復淪滯其傍則為飛檻欄
敞錯以朱黥望之若井幹銀牀鱗差陸歷過客凭
倚延佇則水煙漠漠鸛鷓鷓交憂上下臯樹傳
陰汀花亂發月在荻蒲鳴榔欵乃橫渡琳宮梵塢

倒影中流割然如夢如畫天倪道機皆自浮梁焉
發之迺知偉人奇作與造化爭雄自蠶叢開國以
來實所未見江山有待將非其時乎昔秦昭王使
其大夫李冰為蜀守鑿離堆辟沫水之害蜀人世
世祀之今永康軍有神露冕而黼其袍如王者前
有穹碑書秦太守冰以水事奉黃帝祀即如沈侯
嘉陵江浮梁公不知百世後宜何所食報也沈侯
貞白循良多惠政可銘金石諸無闕水事者法不
書得

王廷瞻禹廟記

帝王世紀及路史華陽元和志揚
子雲蜀記並載帝禹汶山廣柔人

也生於石紐蓋今之石泉縣云然則蜀於禹為發
祥詩姜嫄所當生民之初若後世號稱湯沐邑者
宜有祀考之宋嘗祀禹於石泉又嘗祀於夔門計
有功張价為記其事而今皆堙沒矣嘻何其闕也

今上踐作修舉廢闕興於禮樂靡德不報百物咸周於是中丞巴陵羅公直指隴西郭公咨覽禹跡慨然遐思言於朝請為禹廟成都如秦州祠太昊之義以颺禹績稱皇上倦倦平成之意制曰可治祠城中越三載而告成殿廡奕奕門屏翼翼丹雘有爽肅肅藹藹款若降陟嗚呼盛哉夏后明德之遠而聖主之事報斤斤休奄矣余讀書至禹乘四載同九州作貢十有三載過門不入蓋喟然嘆息於禹烈焉然其辭雅馴畧言之及讀他傳記所載禹治水躬操畚耜燒不及損濡不捨抱冠屣履脫而弗顧所又名川三百支流三千至於胙亡胙支不遂竅息不屬以奠民於安土所謂臣役之勞不敵於此者耶至他稱述戴鈴履已受箕河精如乘龍宛委童律成光無支析之類則又詭幻非常聞余甚異焉然書亦稱洛出書錫禹九疇此與所稱探符授簡者異乎哉今越之會稽山其上蓋有禹

穴焉意者天授神聖以拯九州之溺而貽萬世之安事宜有之如圮橋素書穀城黃石不必盡誣也世稱神禹有以也夫不然何其獨擅神明之號也夫以禹之勞如彼其功若此宜祀一尊邁迹則廣柔為降神之鄉宜祀二泝峻業則岷嶓為滌源之首宜祀三今河濟淮泗之間沿流裸獻而民間又往往家尸而尸祝之而茲土顧無祀豈以沱潛既道蔡蒙既旅數千年無壅決昏墊之患忘其功而遂忘其報乎噫何其負而不德也夫祭之為義有報而無祈河淮以有事而數祈瀆也江沱以安流而弛報忘也與其忘也無寧數數者迫於菑患無所奔走控愬而為之不猶愈於食人之德而忘之者乎皇帝聖哲原念本始允答人心肇嚴蜀祀用彰明德且以重蜀於天下萬世巴蜀吏毗縉紳長老莫不趨走環觀咨嗟感激於斯廷瞻曰迺者國家有事於河河流順軌漉沈澹菑黔首賴祉大矣

哉皇帝之功與神禹並也吾乃今而益知禹德焉
祇奉休命既告成事乃為究度天意推明祭義揚
詡聖謨告之來茲曰
俾勿壞於成祀云

范涑新修揚子雲草玄堂記

蜀自蠶叢立國神明
之胄輒有鴻裁今所

傳詩四章質雅道真實惟德厥訓遠矣故代有
發藻闡奇如王子淵司馬長卿以下疇非藝林亦
懺哉要之齷文龍虎各以詞勝於道真無與焉維
時揚子雲氏深沉聖學體撰契神其大人長楊諸
賦尚土苴一斑勿論論其大者為法言又為大玄
經三摹九据悉根於性命天道洩義文周孔所未
洩即中原稷下羣儒瞠乎其後猥云雕蟲能之乎
說者猶疵其擬易殆淺之乎口耳窺也甚至以仕
莽相蒙投閣美新訛傳口實舉天下之大不遑身
自為之雖紫陽文公尚未暇呼晷其枉矧瑣瑣者

即不敏稽古證今知子雲必不仕莽者為說有五
古者擬人必於其倫揚子比孟荀所從來久矣孟
子何如人並駕推尊明揚可知也史稱郟縣大司
空何君公新繁大中大夫張公濡中郎侯直孟皆
以不附莽見殺此三君者子雲之臭味也先後同
時州縣同地而時論以名流領袖但推子雲仕莽
之事三君且不屑謂子雲屑之乎此以理而知之
法言品藻漢興以來將相名臣獨不及莽時莽已
專漢政伊周自哆乃簡裘一卒愛於千金是何落
落也恚丁傳董賢用事托志於解嘲知至知默惟
寂惟滅又屢斥公孫弘之容而曰如誣道信身雖
天下不可為夫既以咳唾為華袞詎肯以出處為
溝壑且素羞比於嬖寵又豈失身於篡朝此以其
言而知之子雲始為郎給事黃門與莽賢等相頡
頃夫夫者後皆為三公權傾人主所薦莫不拔擢
而子雲歷成哀平三世不徙官薑桂之性愈老愈

烈即反面事其所不屑莽安肯信之况莽篡逆時
諸文學以符命獲封爵者甚衆即位之後欲絕其
原以神前事而豐子尋歆子棻復有所獻莽遂誅
尋棻投諸四裔子雲固同官於莽而素不附莽者
也若先時乘其大逆而傾身以殉則可驟貴加封
爵之榮若後時復美新觸其厭諱則莽必借之洩
怒以示天下而有茶尋之戮兩者子雲無一焉此
以其行而知之嘗讀子雲本傳稱雄有大度自守
泊如鹽釐數千言未言仕莽讀贊謂其受莽官作
符命投閣年七十一天鳳五年卒攷子雲赴京見
成帝年已四十餘矣自成帝建始改元歲己丑至
莽篡位建國元年己巳相去四十一年建國至天
鳳五年戊寅又十年則子雲近百歲與七十一之
數何其抵牾也即始建國元年遂仕莽歲亦八十
餘子雲無耄耋壽安能起白骨而肉之仕之乎再
攷桓譚新語雄作甘泉賦一首夢腸出收而內之

明日遂卒祠甘泉在成帝永始四年戊申去莽篡位遠即未必卒於永始斷亦不出於平帝末年蓋其歲正與七十餘者合也乃云媚莽受爵不大謬乎此以歷年圖而知之前代名家為揚子忠臣者甚夥其在蜀疑以桑梓故姑不引若陸公紀之述元也邈王邑嚴尤桓譚張平子諸人所崇尚而繼之曰雄受氣純和韜真含道建立玄經雖周公繫大易孔子修春秋不能是過考之古今宜曰聖人司馬君實之法言注也力辯揚子安恬非求媚而思富貴贊美伊周諷莽北面曾子固答王深甫之論雄書也比於箕子之明夷又擬於孔子之堅白惜其於雄之事有所不通且求其意而未明辯事莽之非殆抱遺憾然尤有所互證者大醇小疵則稱於韓退之玄經首則美厥靈根雖程叔子深有取焉邵堯夫王介甫亦每尊信其說而叔子又謂閣百尺未必能投介甫直以投閣為妄皆可為斷

案近世胡正甫焦弱侯劉元丙具有始末辯美新
辯且曰揚雄谷永並字子雲劇秦美新乃永文非
雄文猶史載子我仕陳恒孔子恥之指為宰子而
不知闕止亦字子我也叙贊之辭傳失其實蓋孟
堅早世曹大家輩別有所聞而附益之不然孟堅
述雄書極嘆子雲文誼至深論不說於聖人若使
遭遇時君更閱賢智為所稱善則必度越諸子矣
述事若此叙贊若彼不幾自矛盾乎此又以漢唐
宋諸儒之論覈而知之然則子雲之謗何以致此
世之儉壬立心稔毒者何限盛名之下借附滋多
夫人欲速其功者借伊尹主嬖幸為捷徑者借孔
子五威將軍班符命四十有八類當時名高者所
為安知不忌子雲之軋已也而借之以自文且依
稀懿爍炳炳麟麟襲其毫吻噫險矣哉不敏官豫
章嘗欲與友人著古今平反錄一書首白子雲而
力未逮歲丙申承乏參蜀藩詢子雲故里在署武

檐山南復闕舊志宋慶厯間何涉記墨池有準易
堂繪子雲像池心築臺其上有解嘲亭宴會之所
有吐鳳軒今皆失其處獨街旁碑石一片鐫墨池
二大字乃耿中丞子健曩守郡時立者字出米元
章筆點畫風致而墨池遺跡湮於賈區蕪穢潢汙
寄足無地因檄成都施令所學按籍求之會左伯
程公叔明已先下其議施令遂商之華陽張令旋
共聞之郡守協心力以應左伯又請之蜀國主樂
捐池北店十一架地縱十一丈有奇橫二丈有奇
池左地縱丈同橫得二之一居民業近池畔願售
者給其值亦得地十丈有奇時觀察使沈公大叅
董公學憲王公巡憲劉公少叅黃公開司徐公淡
公遊擊劉公各以薪餼助復有右伯劉公觀察兼
軍驛吳公以公事旋助亦如之而一切經畫悉受
成於左伯督理於施令構材必擇鉅麗者石理瓦
甃必擇堅緻者卜吉興事抱坎面離北為草玄堂

六楹軒敞豁豁堂約采稱是堂前為平臺臺前
即墨池濬開逾於舊址甃石以方之池前為西蜀
子雲亭堂後開隙地植陰木納涼堂左右為庖福
兩翼兩翼之南為碑亭二又南各遠池為欄砌綿
亘相望可蒔雜卉奇葩列丈石映清波以想以游
談學娛賓無適而非適錦城勝跡茂有右之者堂
東為儀門外為大門繚垣蓋覆完密一周總計亭
堂池地廣一百二十六尺袤倍之二門地袤六十
餘尺廣半之垣圍共八十六丈四尺工泐於丁酉
仲夏竣於戊戌孟冬所費緡以五百計諸司道前
後二郡守二邑令所助得二百餘緡外皆左伯約
已積贏以濟之上不煩官帑下為貧民食其力落
成諸公以遷擢行者六人獨左伯學憲偕不敏
暨茲歲繼至右伯周公觀察使王公前郡守轉今
巡憲陳公共登堂融洩移日徘徊弔古聚散興思
各溢於題詠之外酒酣耳熱左伯復舉爵揖不敏

余每聞子憤揚氏覆盆今有具地矣表章先哲範
茲來許監司者事也請屬詞不敏愧無文而夙昔
私蓄欲借手以雪又憶慶厯墨池記亭堂諸製皆
當時樞密程公敦尚名義取材辨方乃致底績歷
今六百年復鼎新於程左伯聲應氣求遠相符合
數豈偶然哉爰述子雲本實井初構歲月著於篇
且使天下後世有抱道好修者知浮議不能掩其
光雖千載而下猶有知己何損之有而汙蟻高良
自謂得計者知愈久愈千公論何益之有
茲役也其於世教人心庶萬一有補焉

楊名修諸葛井祠記

成都錦江街中舊有井其制與他井不同大約中虛方丈

深二丈口徑尺許精工堅固非俗工所能為以創
自諸葛忠武侯故托之名然侯之為此也自有深
意或曰蜀都上應井絡且當岷峨之勝故設此井
以通王氣審如是則侯為漢之心可謂無所不用

其極矣侯本草茅一介之士窮臥隆中寄志甚高而托言甚近時未有能知者惟昭烈因徐庶之薦往造其廬問以事勢數語契合魚水斯投乃賊之不亡而漢之不帝惴惴旦夕是故智之所及力之所能真鞠躬盡瘁死而後已且欲以人勝天以神設教如臨印火井其勢漸微闕而噓之使之復盛由茲而觀則修井通氣亦事之所必有者侯之報漢何其忠且切哉顧歲久井且湮沒匪但疎遠即鄉里之人詢厥所在皆茫然莫能對殊可慨矣今年春藥谷王公以大中丞拊循我蜀其治雖因時損益而其意則多述侯之舊大抵開誠心布公道以身許國以德飭政所以為之主本者遠相符合故也考古修廢偶及此井遂命有司大加葺治井上覆以方亭前別設旱碾以利民用井南設屏門一內建正廳三間以祀侯像左右為廂各二門戶區別皆前此所未有者工已名適以訪醫入省成

都知郡大夫馬君過予而告以其事且屬之為記
余自有知以來嚮慕往哲每讀史傳至伊呂才致
必掩卷嘆仰若難乎其繼至漢而得侯又復暢然
以喜也由是而益究心焉乃知古今人所以為學
與夫學之所以為用判乎其不相若而不覺悽然
以悲夫身有出處道分體用固理勢所不能免然
自宋儒始諄諄言之漢以上則不必然也伊呂余
無庸論即論忠武侯方其躬耕南陽與廣元公威
華何所優劣及蒙三顧而後出出而經畧中原謀
猷舉動必中機宜雖其時尚紛爭未暇於制禮作
樂興復古道其以安危為己任親賢遠奸信賞必
罰事先大義言合衆心規模之弘非兩都將相可
望至於用兵如神十發九中張韓鄧馬未許比倫
其學之為用果何如哉陳壽薛兪輩固不足道宋
儒評品亦未超然乃曰若侯者體正大而學未至
其甚者謂真以管樂自許嘗為後主寫中韓六韜

書及勅昭烈取荆益以成霸業遂斷然以其學為
駁雜嗚呼出處有光體用無缺侯真秦漢以上之
醇儒也而宋儒之論乃如是不知彼所謂學又果
何物也哉識者謂舉宋儒以秉鈞當軸未必於事
有濟要未可不謂之知言也乃如木牛流馬八陣
七縱之事特侯緒餘往往奇之大加稱賞見豹一
斑恐非定論矣唯傳侯者云其餘力所及官府次
舍橋梁道路無不繕理茲言其有確乎余嘗謂伯
仲伊呂禮樂有興與三代遺才之嘆庶於評侯為
正而拘士之說政自無所獨益也蘓谷公葺理斯
井亦勿翦召棠不伐孔林之意且使後之人知賢
者所遺萬世不泯而因小求大必有以侯為之師
者風教所繫豈小小耶若以為奇其事而章之不
可以語二公異世之同德矣余明非知人直陳所
見附於記井之末雖不及見侯尚幸見
蘓谷公而請正之也公何以教余哉

勸農記

余暇日嘗讀諸子集則見西山真先生屢為太守有諭同官諭俗諭州縣勸孝勸學

勸農諸作義明旨遠言約事盡要皆可以牖人為善而勸農之文凡六尤簡易通達精切懇到真所謂民之父母其大意謂農為國之根本而勤為農之第一義故曰勤於耕畬土熟如酥勤於耘籽草根盡死勤修溝塍蓄水必盈勤於糞壤苗稼倍長又曰爾於斯時宜悉乃力於耒於耜於溝於洫良農雖苦可冀有秋惰農雖逸荒於田疇孰飽孰饑孰得孰失我勸爾民寧苦無逸其教之勤者備矣又謂凡以害民之勤者其事有十而上下各任其半一曰耽酒二曰賭錢三曰喜爭四曰健訟五曰好問五者之不改則妨時廢日是為游手之民困窮所不免也係於上者曰不時之科斂也曰無故之追擾也曰夏稅秋糧已納重催也曰盜賊之殃未除也曰豪猾之侵未戢也五者之不去則鷄犬

不寧是則為剝牀之災民愁以嘆所不免也其最
後復舉孝經庶人章用天之道因地之利謹身節
用以養父母而繹之曰春宜深耕夏宜數耘禾稻
成熟宜早收斂豆麥粟麻芋薯菜蔬各宜及時用
功布種陂塘溝港蓄水利各宜及時用功浚治
此便是用天之道高田宜早低田宜晚燥處宜麥
溼處宜禾田硬宜豆山田宜粟隨地所宜無不裁
種此便是因地之利既能如此又須謹身節用念
我此身父母所生宜自愛惜莫作罪過莫犯刑責
得忍且忍莫要鬪毆得休且休莫生詞訟入孝出
悌上和下睦此便是謹身財物難得常須愛惜食
足充口不須貪味衣足蔽體不須奢華莫喜飲酒
飲多害事莫喜賭博好賭破家莫習魔教莫信邪
師莫貪浪游莫看百戲凡人皆由妄費無節生出
許多事端既不妄費自不妄求自然安穩無諸災
難此便是節用夫謹身則不憂惱父母節用則能

供給父母全此二者即謂之孝故曰以養父母此
庶人之孝也先生之勸農如此嗚呼孰不為上而
先生不忘乎民事孰不為民而先生不枉乎天真
余嘗欲集其要者為一篇勒之金石播之閭里以
廣先生之惠而贊明王之化顧勢有所未能而時
有所未暇徒托諸臆想也已今年夏分憲阮公訓
飭諸有司聿治陂堰以興水利維茲下邑奉以夙
夜安居縣乞文請勸農事以颺於有衆予聞而躍
然不愛迂愚備述先生之文使勒於石繼今以往
凡邑之治人者之覲茲也則有序諸月令修其常
職慄慄寅畏而不敢侈肆者矣凡邑之食人者之
覲茲也則有力其常事供諸常賦孳孳勤勉而不
敢怠荒者矣禮義興於食足之餘上下交於情洽
之後往古淳風可以自致勸農之義抑又何以加
諸是宜以為

勸農亭記

李長春修建武所城記

建武故山都地燹人屯聚
寇鈔葆此蓋巢穴云異時

戈矛所指往往搏景而還故燹人盤亘自堅虎豹
咆哮於九關誰其搥胸而偉之力也當元年之役
都御史確菴曾公提大軍臨之誓諸將吏曰師不
摩九絲之壘雖穿甲朽鏃不休也卒之高墉推而
堅壁碎鄉者武夫健兒眇睨悼慄不敢闕足之域
今五尺童子可徒手行焉公迺巡省指顧謂藩臬
諸大夫曰噫天地不鑿猶隔哉然山川何雄且都
也矧厥壤沃厥殺蕃梗楠合抱之材大者足篋兕
象莽之生茸茸彌山也是徼外之陸海哉其議城
事已又曰夫山都不城則不戍不田則不屯必留
驍將彈壓之損兵置營庶幾哉據危而固險也其
議繕幕府司署與墩堡事已又曰燹人由漢通道
來魁結侏儒嗜屠裂甚於饑鳥之攫食彼其腥風
鼓扇疆土固污蟻焉欲被濯之非素王弗化也其

議建學事已又曰此巨鎮中將校列矣營壘布矣
壇墀置矣藉令鎮撫觀察之使與憲大夫行部至
節鉞奚止也其議飭傳舍事於是諸大夫賭公經
措井井纜纜犁然當心也因庀材鳩工程能計日
擇郡邑長貳之幹局者分任之而總帥劉君顯參
戎張君澤亦各率其衆操版築以從貲匪賦增役
匪農占經始踰年而功成矣城週四百八十二丈
上陽橋四百四十間下水洞二座三門各樓中為
兩院行臺為兵備道為總帥府為安邊同知署為
生營守備廳為建武所為倉儲為學舍為城隍旗
燾廟外堡十五墩二十二升而望之長堞巉巉穹
樓巖巖鳩壁基置鈴柝晝衙環而覽之阪田蔚施
膏腴滲滿闌闌若織周廬若帷蓋抗重阻而益要
言也史法城成必書又所名出自上命宜特書故
諸大夫李公楊公羅公陳公於不佞授簡焉長春
按圖嘆曰茲地辱在蠻荒自剖判則然也魍魎之

與族狽偷之與鄰日月猶羞燭之何論人羣也而
是役也通縣道為版圖易蠻俗以雅化高城浚隍
之間得以春秋耀吾軍士而令跳呼之徒化為絃
誦印符冉馳牂牁夜郎諸君長胥震怖頓顙各願
葆塞即有塞越獷黠之謀亦竄首結舌而不敢動
蜀中兵日少惟此稱腹心之疾今乃得當俞附蒲
浣漱滌霍然病已矣夫破蠻擒王殲巨寇若拉朽
大勛也刷恥摠憤抹赤子於阡危大造也著籌石
畫使來者拱手而受成大計也視武侯擒獲散羌
威奄山徼不尤燁赫懼伏哉迺諸大夫協應則萬
日柄事則鞅掌咸無
媿媿之勞臣云

陳以勤青居山重修慈雲寺記

青居吾郡名山在
治南二十五里嘉

州江遶郡郭而下至山之北趾曰前津又紆折而
西且三十里復至山之南趾曰後津而去蓋郡下

流之雄障也。山路兩津，垂厓一髮，中蟠澗谷，多塵市人烟，其顛三峯並峙，中名青居，以山青翠可知也。旁曰君子峯，曰金墀峯，巖磴間隱靈蹟三十有四。最著者曰仙人洞，有丹井，丹竈曰七佛臺，有佛足，鳳足之異，曰光明臺，有佛光，時見。登青居巔，望四面，江流浮練，若在几席，景尤奇絕。郡志稱山有亭四，曰白雲，光相，汲江，五友，蓋昔人觀眺遊適之處。又邵公伯溫為郡嘗有詩曰：江上苑亭名四水，山頭禪刹占三隅。則其飛甍連構之盛，尚可想見。至宋淳祐九年，制置使余玠以兵燹嘗暨移郡治於此，因山設險，瞭遠為備。昔之亭榭藍宇，又化為樓櫓鋒鏃之場矣。入我明，來山中舊蹟大半荒蕪，獨所謂慈雲寺者，巋然其巔，殘碣尚可考。為皓昇禪師開山，號牧牛道場。皓昇者，渠江聖果院神僧。常駐錫青居，有禪床木虎之異者也。迨近歲，寺復傾圯，柱礎偃路，榛棘蔽徑，僧多散食，他方余少結。

精舍讀書山麓每登臨四矚風雲變幻舟楫出沒未嘗不嘆詫為洞心賊目之奇而又咨惜墜緒無人力振之者會隆慶庚午余謝政歸里幅巾杖策徜徉山水間因慨然以經營為已任詢之故老僉云寺在山巔上雨旁風僧不能安住稍移下數十武依山臨壑風氣宛蓄蓋吉壤也因饒岨為平移舊宇飭新之為殿堂五間次山門兩廊庖廡畧備其材木工費皆余捐歲祿助之已復莊嚴像飾令僧圓繼住持稍拓旁壤可耕者若干畝資其董修於是名山勝蹟儼復舊觀而來遊者咸有所棲託以遂其窮搜極覽之致寺僧礮石請余記之余起而嘆曰夫茲山也自洪荒肇闢已然時平則幽亭曲榭以供士紳壺觴之適世亂則峭壁深塹以修戎旅渠幘之具隆污之態瞥然若流而茲山者何嘗加損毫毛其間哉顧人情睹變故則必瘁然以憂處安暇則必爽然以喜而余也生太平之世沐

浴明聖之膏澤以休逸其老於此但見夫山若增而怡水若增而澤廣原媚我以晴景長林嗟我以惠風向之壘堞款傾更足指點以為瑰怪之觀而助吾之樂豈非至幸至幸者歟吾又聞佛氏之說惟一真性不壞其諸大地山河皆屬幻相昧若漚芥矧茲一山巖寺舍之廢興毀成何足控搏者然則彼之瘁憂於世變者固為非達而今之流連情境意適忘勸亦子瞻氏所云僅取一饜飽同歸於朽腐者也僧方晏坐精進以修其師之說漫書此付之伴稍知悟入附載營建歲月於左方

順慶府西溪新修廣恩橋記

順慶治左大江而右西溪溪發源西充崇

禮山逶迤百折而來並城西面距大江不能里許若拱若翼若為之縮束演漾潄潄而乃南下稍迴遠滙於江當館束處舊有石橋跨溪載郡來曰西橋相傳宋嘉定間建至嘉靖初始頽塌云其址接

北郭闌外為走省府孔道輜軒瑞節之使相望
舘僮負者趾踵交也夏秋霖潦滂溢溪流扼於江
無所洩芥莽成巨浸傳使坐稽王程征夫弛肩而
嘆馮絕衝濤者往往委魚腹霜降水涸揭洗逗淖
中龜瘕不可忍官或為之架木設杠約歲歲庀飾
疲費矣於是郡人爭言復舊橋便以用詘作勞未
暇也隆慶庚午余謝政府歸里日擊沾危狀嘆曰
橋之弗圖害哉昔野廬氏掌達國道路行舟車輦
互者萍氏禁民毋川遊本朝都水令若曰諸通達
驛道以時葺治河津合宜橋梁者所在起造蓋遵
用周典云且斯橋也亦其廢墜是為將蠲民疾而
非厲之也夫以起利則仁以興墜則誼奉憲令則
恪稽古典則順豈其不可哉會大叅靜齋梁公分
守吾郡姪姪詢民所便苦余首舉為言且請以上
一歲夫廩之賜稍捐田穀百石佐工費什一梁公
曰嘻美意哉顧道路津梁責在長吏其孰若飾廚

傳急也而令鄉之先生長者職其畫乎遂偕分巡
僉憲王公議符合函間之大中丞雲澤王公侍御
允吾虞公咸相與嘉獎厥成下之府若縣商計經
費而崇委西充簿毛鳳彩者董其事毛有局幹稱
經始之日四顧周環覘土藏制曰溪流長而深濶
橋非高廣無以壓水衝即高廣非壯厥基且速之
地兩岸墻塉善崩非厚布之堤以扞湍洩射鷺而
橋不可規固夫語有之堅樹在始矣於是揆日鳩
徒首築堤堤東西衡七丈有奇甃石為之樹檉柳
以護石而後醜流劃波疏淪溪底植巨椿密捷其
下叢臥碇石槃亘螺結為墩離立水中者八從墩
系石犬牙互錯魚鱗雜糞攢扶而上鎔錢液注其
中旁設鈎環為空以行水者七而後成橋橋高三
丈中稍窿起而兩脩平翼之欄楯表之石坊其修
眎高九倍廣減其高三之一其址移舊橋上流二
十丈許其夫役取之十一里若境內寺觀其匠直

若木缺膏聖之需則兩臺各圻贖金三百兩道各
百金太守鄭公遷大尹段君公袞各五十金洎余
夫廩之助為千金而羨者什之二復歸之公帑其
始事以萬厯六年六月十三日其訖工以八年四
月十四日蓋橋成而眎昔規樞閔傑魏壯有加爛
若星梁之架漢蜿若玉虹之臥波雖復狂瀾砰拜
暴浸激軋恬然付諸履舄之下而不知於休績哉
是役也余竇首其議諸大夫謨謀僉同而梁公慙
慙尤力若乃目揣心營無靡財無竊工以垂永利
不泐毛簿有焉當役始作多蹇舌謂成工難猝睹
比畚揭具飭民乃大餼會載經載營靡慙厥素一
日而鳴端長津化為夷陸砥道行旅如歸無褰裳
失楫之鷄邦人士女鰥老黃孺扶攜來觀詎謠祝
佛之聲銷洋塞耳非夫佚道使民民所曹好鮮其
弗濟者與至夫輦石嶽巖絕之淖淵工故不細矣
一無斷絙剝膚之恐若鞭若叱神來相之無亦天

之有意新斯橋久矣姑藉人力成之耶橋既落成諸大夫問所以名之余請以廣恩名諸大夫曰公之業在卷阿之七八矣處隴畝而猶然不忘主上推所為隆輔優者以媚其鄉之人斯名允哉余曰非然也諸大夫分虎竹綰銀艾祇宣明天子美澤起民墊溺登諸枕席維不佞若驟之從鞫焉而何敢自為名於是橋成二年以潮陽周公來守郡始謀琢石紀成績屬筆於子謹撰次其事之顛委若此嗟乎西橋之舊吾郡宿老頗能譚述余童非游詠其處及見斷石齒齒在兩涯也尋則蕩無跡焉矣使橋初阨圻在事者不惜為之傾接絕計則何至遽壞其壞也蓋人也今余等儼天之靈幸藜羣莢以復舊規然而程較勞力難易奚百倍啻矣夫天下事當緒業未造則慮始難樂成易比鑄穴欲生則補塞易撤新難獨一橋然也哉余等勉成其難辟之如室已鎮礎矣所願後君子無忘彌

縫具易斯橋之為千萬世利也其可既乎爰綴銘
詩用紹方來其諸有勞茲役者例得記名碑陰銘
曰迢迢蒨溪自充之西蛻以長兮爰究爰度伊昔
有作轟猗梁兮若塘既治弗塗墜茨失周防兮岩
岩維石日蠶月澹蕩為汪兮厲者滅裾馮者其魚
骨盡傷兮疇溺疇墊恫瘵克念萬夫望兮起墜則
那噂沓孔多築道傍兮荷天之休鄉士叶謀人神
襄兮役者子赴功如其素拓前光兮垂虹亘螭於
以落成舉酒慶兮瀾瀾浸宅駢肩躡迹迸通莊兮
耄倪來觀舞手歡懽頌言颺兮疇克慮始蒙成則
喜逸且康兮成之孔艱期保厥完垂茫茫兮來者
斯愛尚俾勿壞利澤泱兮諗爾攸司眎此聲詩永
無忘兮

陳宗虞錦屏書院三賢祠記

錦屏有書院建自嘉靖初祀蓋太府山陰

柯峯張公為之中有尊道閣三楹貯經史書其上
閣下為大橫函三木主祠晦翁朱先生南軒張先
生兼山黃先生以南軒兼山吾鄉先正卓然者顧
二公一時學術俱樂取晦翁祠之一堂示諸生尚
論知取法也左右翼有齋房幾許各窗疏几榻繚
之周垣以便卒業比閫之長老者云初閫不任人
文即治舉子無法自張公為書院簡郡庠校少俊
者羣其中日討論之自是始昌文學即今源源科
第皆張公遺也蓋至今思頌公德云衙祠閣垂今
五十年碩砌解池榭榭竅蝕植者歎塗者剝階城
榛蕨既非朝夕往諸公竟無一葺之者疑猶在民
勤抑彼疏通罔逮耶非虞敢論矣歲辛未毅所黃
先生以名御史叅知大藩左遷茲守吾郡即知旦
夕且陟宜其情傳舍郡齋然先生却憇總閫劇益
親彊力下車之初百度具舉蓋曾休沐屏山之墟
詢三賢舊額而瞻拜曰嗟乎彼諸亭洞屬遊冶者

置亦可矣獨奈何祠先賢而傾圮之至固聞也乃為度材量日計徒飭工費捐以糜餼之餘力集諸市肆之貨者既踰月落成今峻棟重椽軒翥千仞而丹藻掩映視昔疑加焉固城南甲觀哉先生以問記陳子陳子感焉夫彼治二氏者彤宮紺殿金碧不背人至傾家樂為之不遜則信其道深耳吾儒者治古聖賢即不在莊嚴奉持為教第經顏祠敞宇神主不妄漫不為省乃於治二氏者用心何如哉毅所先生篤信聖賢學宗致知而務躬行其立身訓士諄諄惟孝弟為本亟欲黜浮歸厚挽古淳龐之俗故所為表章三賢者如此先生故重惜民力厭營創視郡後工作首此即先生心可知矣嗟吾黨小子遊息祠下思齊而仰止焉無負先生嘉惠至意哉謹書以記

巴州二關記

巴州治控大小二巴山故多巖折阪詭壑靠峯望之屹嶺西南崔萃萬

狀中黃城者益稱峽岷蔡刺四絕鬱為賊藪四方
無賴亡命逋逃所歸蓋時麻沸突出掠我豢園廩
膚條掠子女磔殺焚燎殆至慘惡捕之輒若鼠竄
伏箐莽乃其谿竇詰曲人莫知所向若柵若巢窟
處却又負固扼塞居然憑陵我不可驟得擒縛即
知蠶蛾眇細不足一撲第其螫人不意求之既去
殊亦力不易加嗟嗟黃城苦類是矣今督撫中丞
黃岡王公巡按御史金華虞公正度肅僚重求民
瘼蓋為蜀之人剔蠹除殘奠輯生養之者靡不極
至頃披往牒得故所為創諭黃城者知其稔惡狀
謂川之北此為隱憂也則以付諸分憲王使君闕
之使君通方廣謀規摹甚辨二公則惟其便宜之
也乃檄之郡別駕吳君往俾徐徊畫之吳君相黃
城介巴達二州間達州業既築龍船關烽候其東
惟是西偏當我巴長樂太平二鄉之衝不為障塞
彼可徑取道馳我矧龍船既嚴彼不得東則併而

西乘我勢且如敵將致魚肉二鄉人啖彼也則相
雲城漏明俱屬要區可托壘壁相距纔十里柝聞
遂及又可聲援相臂指早宜急關梁其上使君則
以協諸分守梁公既以報之中丞御史二公旋以
下郡太守潘君計工築定繇戍儲戎器又因而申
明比閭保甲敷宣太祖皇帝戒諭仍為翼以社學
俾啣咭相達董使興起蓋自是二閭蔚然與龍船
鼎峙為犄角聲勢唇輔嗟嗟黃城即不悛奈何不
警戎倣備乃皆人子有人心者既不得出肆割奪
餓喙靡噬安知不翻然感悟改行善良也蓋使君
不獨欲威賊實欲徠之委使就化意如此則戒幣
陳子屬為記其事嗟乎設險守國王公尚之彼衛
家者必勤環堵矧乎領方隅有疆場之寄者哉蜀
遠事無論頃若丈羅黃賊鐵桶蔡賊尤切巴者則
近如乾溝何賊俱猝起不測之勢大帥雖旋踵就
仆乃既糜爛過當矣今茲方畧早辦曲突巴之人

所儼福威靈有涯哉乃黃城人懼而前其汙風而漸於善也所儼福又有涯哉陳子則又窺使君直方正大凜然風節蓋時悼蜀之人財盡力憊比相率而盜也則愀動顏色故所求在貞廉吏而疾感叱厲在墨者孔子曰苟子之不欲雖賞之不竊然則茲豎二闕毋亦善其次不得已為之手夫巴林藪華實固饒區也僻在窮徼往部使督郵者素不問其地乃先是有巴者孰不厭巴去奈何不俾黃城入盜也今使君儼然三尺在上潘君暨吳君諸英僚在列一時相觀倘所以來蘇巴之人而甦生之自今日始乎乃二闕不斯須鏹之可矣中丞公御史題名在行省臺中梁公題順慶署中使君諱來賢雲南臨安人辛未進士潘君諱良貴浙江上虞人已未進士吳君諱朝宗江西建昌人鄉進士

周洪謨西岷保障圖記

蜀為坤維大都會三面鄰

西南則邛笮都西北則丹馳丹馳有六夷七氏九
羌即威茂二州之地也又其西乃松潘之西北為
吐蕃東南雜氏羌種落既繁險阨彌固羣夷據巖
嶂以為邛籠碉巢善製堅中勁弩走巖壁捷如猿
猱凡蜀民之轉輸松潘者常掠於道其為蜀患從
來久矣然而松潘之所以深入而壘者蓋以據羣
夷之奧室而杜其門戶故羣夷之不敢覬覦成都
者以有松潘也四川都司指揮使周公貴往歲奉
勅往備其地方蠻酋董布等出沒公累能禦之而
夷黨劫奪軍餉公又能親督矢石擣殲其衆公聞
於朝遣使賞勞由都指揮同知而進今秋士君子
有繪圖獻之者題曰西岷保障蓋以嘉公之功而
繫之曰西岷以松潘在岷之西也雖然蜀徼之要
害者莫若松潘松潘既靖則全蜀靖矣是西岷之

所以保障者豈非全蜀之保障也哉繼自今尚其
益殫乃心益遠乃籌使吾蜀永倚公為長城可也
公有勇畧善撫士卒自藩憲大夫及閭巷士庶皆
稱其賢公之先君子有功太宗朝積官如公今職
宣德間公廕補成都後衛正統間征麓川孟養有
功故擢官都司公不惟克樹忠烈又可謂克紹先
美矣公以圖來屬
為記故書以歸之

喻時移清獻公祠記

清獻公祠者祠宋太子少師趙清獻公者也移之何循祀

典而行僉志者也先是臺史時祗役問往招功德
蜀人者於郡之主政方湖王君詢主政君曰功德
莫尚清獻公矣祠在貢院右城隅地僻十年罕聞
式視圯榘腐瓦崩牆頽梁走鼠而來芋木荒岑良
可慨焉臺史時曰嗟其廢祠哉乃垢紛餘檢宋列
傳讀之至公號鐵面御史與辯死振獄觸權救賢

療疾活餓推貧嫁孤按故相之帑嚴卒長之諭執
隨簡之廉流墮蝗之神炯告天之誠溥缺一月之
仁穹秩累加豔名完歸竟饗有哲喬綵堂雅歌山
水之適吳人稱榮諸形模粹然耀然為世標表者
業已傾企矣及於治蜀地迎民弱吏肆不法繩之
而苗薈髮御下慰上服者乃神竦魄動勿勿然有
太史公向往之嗟因念公祠可移而風也商之撫
臺戴公登越掌藩事大叅黃侯光昇掌臬事副憲
王侯繼芳副憲韓侯一右僉憲安侯如山孫侯壁
咸曰都因分臺之西南隙地數弓得無礙金若木
若石各若干擬成都府通判楊繡督治焉為堂三
楹為垣為門為坊當通衢俾人人瞻而歎艷云祠
成則壬子冬十二月也夫貨賄行而騰虐榜筮濫
而干稊有司者蔽也久矣是故取往可以傲來舉
哲可以範愚龍龜繫介鱗之宗星緯切昏旦之仰
玩繁簪而得宛珠必愕迷雜珥而觀傳璣自竦莊

顏作於蓬髮禮服飲於卉裳謂公祠之不足以風
世也邪肆率諸部吏署成都同知邵大爵通判王
譽民推官吳國寶而下如祭典血食之藩侯臬侯
謂不可以無記也故述之云爾侑以辭曰彼阻蠶
叢山川遠而貪黷易暱魚獵橫施凋氓喁喁遐裔
曰咨覲焉媮合澄者為誰猗嗟清獻百世之師恭
從王事專與惇嫠詢瘼於微滌垢其熙飲水作標
委玉宣儀簡易弘耀中和協宜子罕讓績伯夷同
遠苦心一節清風四馳俯焉民驩上則主知元儲
作訓英台繼禕九圍慕聲四蜀蒙毗遺愛如覩世
孝鮮比國之元氣人之遐規省府爾希里落其綏
陰扶躋化永贊瑤禧錦江走龍玉壘蟠螭清獻之
風流益柯期遷祠煌煌然蘭
熹熹叶誠勒丈神之聽之

劉應箕忠孝節記

刑部左侍郎胡公以革除初死
建文難自永樂歷弘治俱以時

禁未解宦遊者憚弗敢談厥事後御史熊公相巡按四川立祠於榮縣祀之時正德八年去茲又七十餘年矣尋廟宇傾圮蜀之學士大夫談靖難革除事者俱彷彿未究其詳至於胡公尤惜惜焉鮮有悉其顛末者余每慨世之司風教者狃於故而弗敢彰善表節義縱心有所嚮慕亦欲彰明往哲而終弗克自振竟寥寥焉胡公不幾於湮沒耶萬厯甲戌監司田公分憲川東其除奸剔蠹明罰勅法蓋罔有遺力焉而敷政覃化之餘又恒以風教為首務適部使者孫公暨郡守朱公咸與公同心同德銳意崇尚每諸有司來謁見者輒以其邑之行誼風俗古今人才下詢爰諏博訪恐砥名勵行者晦弗彰也不數月大足令康君果來言胡公事載在縣志者畧不可詳然其出處之大節仗義之危行則固有以備其履歷者夫君臣之義綱常之懿乃生人無所解於其心者恒人或競榮而迷道

或怵勢而屈身或歷難而易慮則秉彛之賦在厥
心者亦將解之以縻於世而罔知所以自振焉者
滔滔也乃胡公當靖難渡江之際首倡大義抗節
不屈彼豈樂刀鋸之慘而惡爵祿之縻耶記稱其
富經術性方介其再從方孝孺游漢中蜀獻王有
問學日廣道德日隆之贈則其所以抱蓄於胸次
者固不凡而稟賦於天真者自與恒人迥異故當
利害臨大節乃能脫然不怵於勢不競於榮不改
於慮若中流之砥柱屹然登華嶽而不可移若逝
波之入海千瀾萬折而不可回也嗟乎傑哉百餘
年來顧未見有表彰之者果以時禁未解耶然文
皇帝為高帝之子建文實高廟之嫡孫革除諸公
忠建文所以忠高帝文皇當諸公之死曰彼食其
祿自當盡其心耳昭皇帝亦曰若方孝孺輩俱忠
臣也永樂中先後詔復諸公家而胡公與焉綸綍
何諄切耶提挽綱常培植國家億萬載祚運於不

替者胡公之節義其闕係世道豈少哉田公仍
飭邑令康君芟地鳩材於縣部之南建祠立石而
又定其常需命有司春秋祭饗復喬胡興先等課
額令之世守祠宇夫廟貌森嚴棟宇華飾風節宣
朗也歲祀無斁衍茲蒸嘗神明監繫也復其家恤
其後俾之世守堂宇忠魂依托也諸敷誼崇化之
典其偉歟胡公諱子昭字仲常名志高誌載謂太
祖改今名往來從學方孝孺講明理學蜀獻主重
之以明經儒士薦為榮縣訓導建文初陞翰林檢
討進刑部左侍郎靖難師渡江建文四年九月死
之時年四十一父名復初母郭氏皆年八十餘子
五人給緝繼等謫戍女金奴沒為官婢胡子義初
名志遠亦膺薦辟分教咸遠又陞山東按察僉事
及遇兄難棄官匿丹稜晚有懷鄉詩載在誌帙者
聲意悲壯蓋有得於兄之教而伯仲齊鳴者也蜀
嘉定誌具載二公為榮縣人然備查胡氏家譜及

子孫作佛事錄籍并永樂赦復其家勘合俱為重慶大足人記載明甚而榮縣則子昭初訓導所經地也或曰志遠為蜀府典寶或曰子昭為史官陞兵部侍郎刑部尚書或又曰子昭無子止有一女名金奴各記載者以時諱不敢彰灼其事故彼此舛誤互為沿襲然胡公孤忠勁節所以扶植人紀綱維世道者將與天地終窮固耿耿不磨也其他又曷足深考耶若夫楹椽瓦石之細祠堂棟宇之度則有司存又何暇悉記哉余惟服當時同難共事一門父子兄弟之高誼御史熊公之令圖而又嘆今部使者株覽監司田公之表監郡守諸公之振拔邑令康公之經度足以風世哉足以風世哉

黃克績合州重建鄒汝愚祠堂記
嗚呼自古賢人不遇而死者何可勝數然皆其臣是而其君非也獨賈太傅遭遇漢文不世出之主言幾售矣竟賤

長沙悲痛天絕此千載而下所為憤鬱而不平也
茫茫宇宙慶殃反覆賢人罹禍古今一揆若鄒汝
愚先生者又令人深怨而極悲矣先生弱冠登第
讀中秘書值孝宗皇帝即位聰明仁孝千載一時
乃矢口言天下大計欲進賢而退不肖自以為引
繩批根可幸無罪故直抵執政侵貂璫而不避也
豐蔀蔽明日中見斗竟令權奸得售其計以他事
中之遠謫炎荒溘焉朝露嗚呼先生之志過於賈
誼南海之謫遠於長沙身沒之年短於三十悠悠
天道慘毒實多何忍言哉昔太史公作伯夷傳謂
盜跖老死東陵夷齊餓死西山致疑於天道之是
非夫夷齊之饑夷齊之所安也彼其志扶綱常身
甘槁死視百歲猶旦暮等彭喬於蜉蝣苟得死所
雖千萬載可也又何恨於彼蒼獨謂先生所處則
可以無死者一言不合遇巷有期閭闔萬里生還
可俟使帝宣室求賢逐臣見訪則君臣之交歡於

魚水豈慕不遇世死者哉乃為炎風瘴雨所苦一
疾不起天之報施善人於是為不可知矣先生既
客死厥配劉孺人扶柩歸蜀皓首全節從先生於
九原邦人士為立忠節祠而俎豆之志雙美也祠
在空山間寂無人歲久不葺且有風雨飄搖之患
新安汪潛夫督學西蜀詢諸士子謂祠廟不稱何
以崇先哲而風後學乃請於中丞艾公直指王公
檄州守曾君移於郭內而更新之由是廟貌改觀
士知鄉往祠三層層三間其外為門中為堂以居
先生神位後為寢室以居劉夫人像堂室左右各
房三間棟宇牆垣飾以丹堊施以塗茨行道之人
顧瞻嘆息謂此鄒先生祠也樹以人懷烏緣屋愛
天理民彝此謂不泯矣余承乏西來樂覩成事乃
為之記蓋先生下獄時有欲以危法中先生者少
司寇惠安彭公予鄉人也獄成不署名先生得不
死其謫石城余鄉蔡虛齋先生贈以詩有終不為

君恨天地有正氣之語其不肯何敢望二先生後塵然好德之心同符先哲讀先生傳而不潛然其出涕者非夫也故不揣鄙陋叙其始末若先生之所以不朽者固不在祠之有無也曾君名嘉袞麻城人崇獎忠節得為政首務是可書

陳文燭牛頭山工部草堂記

潼川蓋唐梓州境而牛頭山在郭門外杜

工部嘗登其上所云三載客蜀郡一年居梓州是也參知梁尚賢憲使王元德分鎮劔南捐金度木命刺史張輝南為草堂於山巔余試士過焉刺史乞余記之嗟乎公遭世變飄零於蜀或自綿而梓或自閬而梓坎壈之狀千載流涕而誦其詩者興忠君愛國之思即公在梓州詩如王侯與婁蟻同盡隨丘墟願聞第一義迴向心地初子瞻嘆其以詩入道猶庖丁以牛入也輪扁以輪入也蘇氏知

公乎是公詩多於蜀而妙悟於梓公神其托茲山
哉天壤俱敞可矣昔唐陳子昂梓州人公過射洪
學堂撫遺跡而弔焉有盛事會一時此堂豈千年
之詩若為今日而言者則牛山數椽與金華並峙
乃不穀之慨慕於公奚啻公於伯玉哉浣花瀼西
余業有記而今又托乎片言具有私感與若謂能
飽公殘膏賸馥而揚榷之則余豈敢

曹樓重修成都府儒學記

余覽史籍見文翁當漢武時天下承秦後人不

知學蜀最僻陋而獨首建學校遣子弟入太常修
先聖業其效至文學比齊魯常嘆美之思一觀其
遺風焉已而承乏拜西川督學之命安治之明日
祇謁先師周視學舍見其規制赫奕氣象森古詢
之則相傳為禮殿之舊蓋愀然有餘感也學故修
葺於弘治之十三年越六周星圯壞湫塵傾歌走

柱時久則敝其理固然顧非所以安聖賢而崇文
教况首郡實全蜀之倡泮宮尤具瞻之地哉欲新
之無與計者適郡守耿侯初至見與余意合而或
者難之謂費非數千金未易辦役非二三年未足
就况木政旁午事在中柅耿大不然請得外府金
五百粟千石勤里旅三月而以落成告余視焉則
殿廡更新門堂重巖黝堊丹碧綦錯熒煌石砌堅
完垣堦峻整不獨師儒寧其居而聖賢棲靈之所
亦足以肅拜瞻而虔禋祀矣心樂其成而異其速
諗其故則費大半出耿侯奉錢而父老子弟嚮方
慕善任勞宣力者咸激於侯之義故財不誑公帑
工不費時月而事以克竣學博士及弟子員請余
記以傳夫文學吾職也記慈可已為之記曰吾聖
人之道等於天地彌綸乎宇宙而貫徹乎人心生
民舍是無為命脈矣官師舍是無為政教矣彼文
翁何人漢何時而乃力行教化大振文風豈吾道

有將昌之運而首試之蜀抑天將開蜀人文之盛而潛啟其衷耶一時即有司馬相如張寬輩顯於朝後之學士大夫誦詞賦之英誇七車之富不獨羨二子而歸德文翁文翁雖賢不有二子亦無以成其美矧今熙洽之朝隆於漢代師帥之賢不讓文翁而蜀士之盛遠邁古昔其何以自樹立而稱飭學者意即以學宮喻夫子宮牆稱高美然五倫其棟楹也六經其門戶也而其理具於吾心自有繩墨者在焉子亦見夫匠氏之營斯學者乎基址奠矣羣材具矣必端其意嚮注其神視直以繩經以墨而後門列戶分棟隆楹峙數仞之牆指顧而成則脈理貫通而操之有要也學亦如是矣今聖道稱大興而人各就其性之所近安於意之所向以自為習百家諸子乘間開竇爭門名家啟岐途而塞道真鉤竒翼詭之士博聲華競世利茂棄倫紀綱常於不恤蓋身遊聖域賢闕之內而不覺自

震於戎徽夷島之外戾於夫子之指矣耿侯新斯學也夫亦有厚望焉耳諸生處止其中而欲不愧斯學其說在聖訓而其事在日用也毋迂視誠正之說則繩墨端毋支離六經之門戶則趨向審毋撓折五倫之棟楹則植立固聖人之堂與吾且登焉而漸於入室即端木氏所稱美與富者心親之而身有之矣此學庶不虛哉若實華而濇其實紒高而削其址過孔子之門牆衆且麾之彼文園侍中高不負文翁爾諸士亮不忍負耿侯必有進而求之者矣耿侯諱定力楚之麻城人起家進士初為駕部郎有聲其學實宗伯氏伯氏倡道東南為海內宗侯講其業故治尚德化崇本務若此舉尤其守成都

首事云

耿定力大儒祠記

成都之有大益書院昶自正德戊寅歲越嘉靖甲申始落成即

萬眉州相府故址也督學使者萃三川髦士為除
舍授廩立程而教之一時號稱得人內江趙大洲
先生其最著者以宋周元公曾僉判合州二程侍
太中廣漢伊川又涪州編管尹和靖就其師涪州
注易與華陽范淳甫綿竹張敬夫蒲江魏華父俱
祠祀之使諸生有所矜式已考明薛敬軒以大理
督餉至蔣道林以觀察水利至與合州鄒立齋祠
祀祠中歲丙寅豫章胡廬山先生入蜀督學首定
祀典萬歷丁丑故相張江陵盡毀宇內書院毋使
諸生聚議大益書院亦在毀中諸儒木主尚存弗
祀也歲丁亥督學使豫章郭相奎先生為胡公高
弟屐謁祠下低徊嘆曰學以景行祀以志思大儒
在蜀可弗祀乎爰檄郡邑修祀事題曰大儒祠因
諸生請又以大洲廬山及前觀察使孫淮海祠主
入祠命不佞力記之不佞力念洪荒既闢維世覺
人曰君與師自天子以至一郡一邑之長皆君也

自聖人以至一言一行之善皆師也君之治績顯而易見師之教澤隱而難明然不藉名位不假刑賞風施奕世澤流罔極尤稱師哉大哉孔子為萬世師矣漢唐鮮真儒獨以詞賦擅名學者質質焉莫知所師元公崛起荆楚主靜立極蜀其過化也彼其初風之未同蜀與中原尚分黨而角立迨其既也張魏二公同聲相應異世而宗濂洛之教信哉師道立而善人多矣淳父文章節義蜀人所共推轂而依依與吟風弄月者為伍豈無所師承耶明聖人御宇作之君師淳化所漸真儒輩出士之秉道而入蜀與蜀之應運而名世者皆薄辭章而崇本實尚躬行而窮性命無論漢唐蓋駸駸于由元公以上邇孔子皆然矣古者上帝有專祀列國祀其境內山川諸儒在蜀辟則名山大川也是祀也不出蜀都而有餘師焉可已哉世人欣豔貴富者至天子之宰相極矣萬眉州不能撫有第宅張

江陵不能禁人之必不崇儒亘古今參
天地在此而不在彼學者其重有省夫

郭子章陳文端公祠堂記

萬曆丙戌冬十有二月
子章入蜀道果州過大

學士陳公廬而式焉是時公坊已五月矣又明年
以試事入果州欽弔公靈於棲樂山之麓長公學
士君持喪壘室子章從學士君所得盡讀公生平
所著學明日果州諸生上公祀鄉賢狀子章曰公
非三川一鄉士也諸生固請曰江出岷漢出岷岷
分流外馳所注無方所出則有宗果亦公之岷岷
也已惡得無祀乃下有司崇祀公鄉賢又明日諸
生合郡邑父老復上公專祠狀子章曰公業已並
俎豆於兩先賢而專祀奚也諸生父老固請曰日
月不並出孤不二雄神龍不匹猛獸不羣公道繩
聖賢功施社稷其行純矣惡得無專祀乃下有司
以其狀聞之少司馬中丞徐公柱史何公守道大

蔡劉公如有司議卜地創祠專祀於果城學士君
間而詣子章曰是非先公志也先公生而恂恂於
鄉待市井小兒情濶不竭物而以其祠房醵享之
貲費其粉榆人不孝臯矣何辭於先公子章曰不
然下邑故相楊文貞公子章為諸生時曾相祀事
於其祠已司理建州建州楊文敏公祠亦如之今
席文襄趙文肅二公皆專祀遂內匪創自果也學
士君曰無已請拓舊鄧自屋之下無煩里旅上無
損於公帑以終先公志以儆諸大夫之患於百世
於是有一聽學士君祠而僅以春秋祠具載在
祀典亡幾何祠乃落成有司者齟吉奉公主濟濟
森森薦豆其中學士君始函書告子章曰先祠以
今年正月甫事七月已事內而廟寢堂廡外而旅
樹唐陳旁而墉垣牆屋幸俱糞除當秋之次丁日
已設先公位腥肆爛膾絃歌而薦之矣惟是艱牲
石未辭敬以屬子子章三讓不獲竊惟公當隆慶

初相昭陵其豐功駿烈幕帷惺而曜台階國史書
之大司馬張公狀之彪炳矣至其未髦而縣車無
邵而告眎捐相印如釋重負許相國銘公謂近
世大臣出處之際未有如公勇決矣夫公之出而
相天下也相則伊呂相而處也處則綺黃使夫人
眎之若春夏秋冬不可為常子章常竊窺其微矣
公之言曰行一不義殺一不辜而得天下不為方
可稱王者政不與適人不與間而能格君心之非
方可稱王者之佐又曰生之於人大矣一失不復
得者也人以至貴之身而遂至賤之物如明珠之
彈雀以有涯之生而役無涯之知如精衛之填海
以恬然無恙之生而自投於必不可救之地如夜
蟲之赴火以奄然有限之生而好為人所不知何
人之計如愚公之移山其約而言之則曰逆來順
受可以廣度順來逆受可以燭幾嗟嗟公惟廣度
也廣度故能格非所以應待萬方覽耦百變也而

成昭陵之相業公惟燭幾則肯生若轉丸掌中足以自樂也故不難巖居川觀以成今日一代之典刑由是譚之公之所以相所以捐相其得之說約者深也昔者孔子為魯司寇攝行相事三月魯國大治齊人歸女樂孔子不稅冕行伊尹出有莘政鳴條相湯以王及嗣王克終允德始復政厥辟而歸說者謂仕止久迷用舍行藏夫子若太和元氣千駟弗視一介不取尹蓋以天下自任古聖賢相人國其出處進退類如此以公視之何如哉可以勒於彝鼎矣公名以勤字逸甫號松谷一號青居山人其先世出閬州陳秦公後幾傳而為訓導衡衛生太學生信信生大策是為公父以公貴三世褒贈如公官子即學士君溫文貞白隱然負公輔器如公當日云子章通籍晚隆慶庚午舉於燕而公以是年去國丙戌任於蜀而公以是年捐館舍不得一日侍辟呷之詔乃交驩學士君時時習聞

公令德名訓猶侍公側也因錄祠事饜聽興誦方
高山而仰止媿鼎銘之無文其辭曰粵帝會昌宅
宇紉閣下為岷山上為井絡金隄東雄玉津西鑿
景福旰饑神降棲樂清泉蘸月寶臺鳴鶴篤生異
人暉暉綽約謫自列宿鬱為帝師行齊曾史學願
宣尼洵比宥渠魏埒綿庇肅皇之季公守其雌昭
陵御宇卜曰非巖作歲霖雨為國元龜十事沃心
四劄陳悚歲星熊熊冬日煦煦氓繇昭蘓士頌陶
鑄帝眷方殷歸來乃賦育於丘園致其師傅綠野
裴晉洛陽文潞公惟廣度大人格非公惟貴生哲
人燭幾出也虎變處也鴻飛道遙莊濮容與嚴磯
帝念舊臣屬公古稀鐘鼓喧闐寶錘紛緋得全
昌星隕天府天子曰噫奪予尚父太常議謚司空
復士嘉陵瀾瀾周原膺膺巴賔父老涕洟咻噢祀
公辨賢築公廟廡匪位之欽惟道是尊於以薦之
采蘋采蘩於以奏之頌麓頌墳感德百世福行來

昆西京韋平東漢楊袁
勃之珉石永式神垣

溫江三烈祠記

予讀漢廣詩謂文王化行南國先及江漢游女在今荆郢間以地考

之文王都岐即今鳳翔之隴距劍門咫尺岷山導江東別為沱始東至於澧關雎之化自西而南惡能不蜀而楚耶竊意蜀之願化當速於江漢秦漢之際代以節烈著巴寡婦清用財自衛不見侵犯秦皇為築女懷清臺漢元氏女求父尼和屍於巴江哀號自沈明日與父同浮江上岐隴之化流長矣予入蜀行部訪貞懿閭里過岳池得石氏三姑矢志不適共拊弟孤聞之直指何公表厥宅焉已入溫江溫令仝君方上任氏三烈三烈故任教諭高妻李氏及二女么哥雷哥也教諭由錦陵遷萬載舟薄華巖湖盜掠其舟欲犯二女二女罵賊赴水死其母從之越三日屍浮水面抱持如結錦陵人

義之留葬江澗楚中丞趙公賢聞於朝移文於溫
溫令某即教諭故宅旌之有年矣乃者里豪宅鄰
祠給任氏子將鬻之全令廉而讓鄰豪捐金敞其
祠并飭檄楔成都詹守聞於予予頗其祠之堂曰
江漢清流三烈實沈於江漢也已上其事於直指
傅公公旌其義於是溫之三烈與岳之三姑並稱
蜀中眎巴江元女清臺寡婦三千年一轍豈闕睢
漢廣之風至於今猶烈耶全令復白予言鏡之麗
牲石予惟曹娥之碑出邯鄲淳饒娥之碑出柳宗
元故能幼婦當年膾炙後禊子媿不文而揚芬表
烈又督學使者事乃為之辭其辭曰維江之源出
自岷山浙清於灌匯為嘉陵出夔入荆合流沔漢
江漢之間被化岐隴家生淑媛蜀氏三烈從夫從
父錦陵之類繇楚入吳賊岸華嚴橫流而亂榜人
不戒潢池从合遂遺於難匪利其貲實榮其色女
三為絮母女交臂妹妙牽裙赴波如飴若堯二女

為湘夫人峙於九嶷若楚貞姜漸臺以俟沈於水
涓漢之廣矣江之永矣不死者誰五華之望三澗
之濱孤冢纍纍楚臣以聞天子曰噫國有貞姬移
文蜀郡即其故里春秋以祠我來行部漢羨元女
秦推清臺不恤有家惟弟是怙岳有三姑如溫三
烈鳳兮噫噫麟之儀儀乃檄有司式廓舊宅載葺
故帷為歌楚些為哭天乎齋咨涕洟魂兮來歸蓬
爾錦水棲爾綿虎曹有邯鄲饒有宗元子媿其辭
惟揚爾芬鏡之
貞珉千載女師

西南三征記

蜀之北與秦鄰東與楚鄰稍東而南而西與夷鄰夷最巨者冉駝白馬之

種或上著或移徙蠕居雪嶺洸河間皆氏類也比
松茂而耕牧國初設松潘衛鎮之蜀人曰松潘夷
夜郎邛都牂榆之種魁結繡腳隨畜遷徙無常處
地方可數千里南距滇西距吐蕃國初設建昌越

嵩五衛鎮之而屬行都司蜀人曰建越夷其種族
繁夥聯絡於邛之西犍之北界於烏蒙抵於馬湖
為臙乃黃螂雷波牛牯等部而臙乃為大屬邛部
自馬湖設郡以其地邇蜀人曰馬夷此三夷者秦
漢以來各自雄長建元間唐蒙司馬相如始建議
通道戍轉相餼耗費亡功尋罷之獨置南夷夜郎
兩縣一都尉稍令犍為自葆就不能臣使也其後
竭天下力挾平南越之威僅乃通之置越巂沈犁
汶山武都四郡唐宋以來西夷多沒於吐蕃南夷
後割於蒙詔元初始復漢土而乍臣乍叛邊屢失
亡至隆萬間三夷鼎沸靡城柝堡今上命少司馬
宣城徐公案西南邊事公至不二載三駕而蕩平
之子章典在筆札乃以監軍謝君詔行陳紀事作
西南三征記夷松潘古氏羌地自洪武十一年御
史大夫丁玉討平之設松潘衛衛故有二路東路
由江油抵龍州西路由灌口威茂抵疊溪縣巖羊

腸道莫通五尺山間盤錯羌環居箐列砦四十有
八當事者羈縻之每歲元日餅以金繒歲不下數
十萬鏹羌飽日驕狂逞叵測萬厯初魯賓兔建立
五王城距松潘千餘里羌有白利者述賓兔近番
地躡作兕草作兕草惜伏而傳賓兔語叩寨以告
於是邊吏慮賓兔氛惡而羌中國師喇嘛者黠且
健連於賓兔恫喝中國勾引部落雜沓松城內以
外千計勢益張諸族牛腦羊腦灣仲占柯等咸附
焉鋸木刻合大小姓詛石畝盟時時團結黃沙壩
唆伏礮壑中虜掠行旅轉餉及踐更卒膏血塗草
野至邀塞總帥車旗殺千夫長百夫長二人乙酉
夏楊柳番與太平堡解牛備市肉食而斃詭云堡
人酖之嘯聚諸番六月攻普安堡驚埽水崖掠石
門擁入金瓶堡要增歲幣格殺百戶陳克勤中丞
雜公聞於朝則以兵屬今都督李將軍應祥將軍
提三千人趣茂州與副使劉禹謨黃焯計攻克楊

柳廟子虵蚤諸寨十月徐公至蜀三馳檄往諭之
不聽築塙浚溝以絕東南聲援見戰卒不盈數千
相顧笑曰南人磨子兵奈我何磨子謂子旋轉數
不益也十一月丁巳擁衆五千突犯平夷堡官軍
與戰卻掠我去劔其腸統二牛角上急驅牛奔
賜寸寸斷報至公上疏得請乃徵播州酉陽平茶
馬湖諸上兵檄右布政朱孟震主軍興參議王鳳
竹監諸軍副使謝詔覈功罪羌乘大兵未集丙戌
正月既望擁萬衆圍蒲江闕駕七梢砲環擊城
幾陷叅將朱文達出與賊殊死戰殺傷賊數十人
始解去已諸路兵繹至公出視師永康召諸將立
帳下指授方畧曰河東西吾力未能畢舉西阻於
澗東連吾堡甌在剝膚汝等并力擊東勿失又曰
賊敗必泥首皈命惟是我衆降賊尚夥汝等亡殺
降亡標榜衆皆唯唯乃檄遊擊周于德將播州七
千人營錫錫嶺遊擊邊之垣將酉陽兵五千人營

將朱文達將平茶兵四千五百有奇營茨溝而一
統於李將軍二月庚寅昧爽將軍警師鎮平分道
並進三月丙申國師喇嘛率灣仲占柯等犯歸化
于德伏擊於鐵爐溝一戰擒喇嘛灣仲守備曹希
彬牙將劉繼祖擒占柯綽兒拓等軍威大振戊申
破丟骨又破人荒阿牛阿用卜洞玉琢等砦壬子
文達兵由問道襲克阿孝擒其率刑兒柯東兒拓
是日成之垣各出兵拔龍溪鹿卜乙卯于德兵圍
沒舌砦沒舌斗絕賊踞險自固我兵四面火攻賊
盡燔死丙辰丁巳諸兵合攻煥砦始嘉靖初輪以
克之之垣於茹兒獲其祖輪髑骸始嘉靖初輪以
松衛指揮守北定關遇害茹兒令鏤其首漆為飲
器至是歸骨松人詫焉四月戊辰破慈闈窰溝石
柱餘賊奔雪嶺復聚茨崖會諸路追兵至賊悉委
牛馬輜重啗我我兵斬闕入賊辟易窰死崖下河

東平公乃趣諸將戰河西羌思答地等恃水漲晝
江而陳待我公與將軍策曰彼恃河湯池我誠出
不意夜絕江擊之西賊必不支我既西粟谷必懈
回戈東指勢若從天而下此所謂首尾如截應接
自難也諸將爭言莫吉將軍曰羌未見我兵恃河
為凶稍遲兵形露賊空壁遁我即渡也為也亟誠
諸將如期鷄三號悉引兵乘筏渡河薄賊所遲明
賊駭竄猶出死鬪我兵批而殺之克思答地標下
士唐萬興射殺前鋒一人即前手及百戶陳克勤
者諸縱發分擊西坡西草歪地乾溝樹底雙橋挖
撒等砦羌敗走晝拔之晡收兵會食大雨如注竟
三日江水漲筏蕩諸將始服將軍先見云粟谷以
兵既西備果懈五月壬寅夜既半成兵襲破其上
中下三砦斬首數十級餘黨遁追至白草乃還甲
辰克牛尾牛尾最狡酋合兒結善占卜豎柵自雄
將軍分兵三路之垣遮後文達左拒叅將劉用光

右拒宣慰楊應龍以所部精兵從中擊之賊掘柵
礮石下如奔馬諸軍奮死登縱火焚柵斬合兒結
父子賊潰我兵追及之連戰松坪黑松林黑水河
賊大敗半赴河死得所積糧食軍軍留十日燒其
砦餘糧以歸時東西河俱下殘羌竄巖谷中依偏
頭結竇通譯者詣軍門降請罷兵埋奴受降先後
埋者凡二十三人牛尾又出丁馬羌所予銀鏢質
於官以示款誠且指示廟子溝所詛結盟石碎河
中郭成帥衆壘營於黃沙改名平番隱若石城比
之無憂焉乃疏諸將功次於朝上嘉公功晉兵部
右侍郎廕一子諸大夫將士陞賞有差公既平三
賊還錦城乃建南羽書日至三司諸大夫議曰羌
與虜鄰國之尾也蠻左滇右蜀而據其中腹也辟
之如牛馬蚩蠻集其尾猶且祛之顧任侵其腹莫
之藥乎公唯唯乃疏曰臣秉節鉞鎮茲西上越嵩
土人不靖非獨三城也瀘河之南邛海之東諸夷

猱番部雜居地寬長孽物衆藏奸建有叛夷曰安
守曰五咱大咱者俱土官瞿紹良部首日謀喋血
牝主因而煽虐逞狂越有印都部落曰黑骨夷者
始以酋長構爭流毒境土甚者及王官據篆符不
奉天子法度臣竊懼焉建越倒懸急矣請拯之疏
上制可徵天全刺馬諸路土兵募雄邊子弟益之
共萬八千有奇十月監軍周光錫自順慶入建昌
宣諭上威德首廉指揮徐孝忠寘之理以絕夷內
援已諸路兵繼至李將軍以十二月辛酉至僉議
河西桐槽當分擊之且置黑夷勿問叅將朱文達
領兵七千守備滕光國生營田中科攻河西五咱
遊擊邊之垣領兵六千守備王之翰翼之攻桐槽
王大咱以都司段文炳干椒於越窩且護糧餉行
都司宰調元通叛丘一奇專出內將軍自統材官
吳文傑兵二千居中約丙寅抵賊巢以甲子夜半
發越窩直走三百里文達兵夜抵禮州所百戶張

勳者陰結五哨偵我時倉卒勳不之知昧爽陳軍於河賊半渡迎敵文達居中光國右中科左將軍殿後材官周以德兵衝矢砲盡發賊潰我兵鼓噪渡河斬數馬賊河水上直搗諸巢柵破之据其險而壁馬是日斬首二百五十有奇走水死者無算之垣之翰兵攻柵斬首百二十有奇丁卯文達兵攻棹木箐戊辰攻磨旗山連城之之垣之翰兵攻甘縣破之大哨亡匿山谷中壬申五哨馬賊千餘於磨旗山挑戰我兵四出各張左右翼以德兵衝賊騎馳兵分縱馳半合擊斬三馬賊餘盡披靡諸死傷無算賊退保旄牛山旄牛者故漢延寧間張喬破越舊夷地也十六日丙子文達兵大破之夕時大風起撓槍星自東南霄夜半賊西遁與安守合守故紹良族子嘗為巡捕長遂用此以部勒諸夷誘漢臯人亡命者為逋逃主巴中猾陳光華者為之主畫刻篆符自佩出入擅僭制乃與五哨

保聚西溪沙戶馬立三大柵自固於是調之垣之
翰兵來會丁亥將軍移於河西是日調鹽井刺馬
兵三千亦至犂犂跳跋畫襍軀類非人形夜壁河
西與將軍營相望會有詞賊謀劫營者將軍震拔
營而徙夜二鼓賊果來襲遇刺兵敗之自是賊退
保沙戶馬諸路兵進攻急賊潰走我兵力追於魚
水安界前後斬級四百有奇五哨走抵魯罵魯罵
者故哨父逆止廝役也其子擢拍力可敵數十人
故哨依之逆止死時時下巫言禍福每教五哨戰
法且云歲在戊亥不利土人崔繼賢者謹祀之陰
與張勣厚自蔽於哨至是連勣與賢責以詞哨是
時公移鎮臨邛采議者言賊乃即黑骨種而黨逆
有黃螂一路又即安守族屬恐賊急遁賊且防賊
出與賊合於是徵兵三千以都司李獻忠守備劉
繼祖指揮尹從壽領之馬湖戒之建而不狃三月
庚寅將軍與監軍議南夷以安守為望非先致守

不可得五哨然守迫不可卒縛計誘之乃佯出循
河西諸營問勞諸兵士疾病者歸而壁理經堡示
轉鬪五哨於西亡東意是夕訶者報守賊集大斧
火炬數百宜備非常將軍戒諸營壘待之以中料
領兵六百劄于麥達去守故砦三十里守果率衆
潛歸伺虛實庚子夜密遣材官高逢勝屬精兵三
百銜枚間道雨夜入麥達營伏又檄諸屯田吏士
伏營左右為援壬寅守來襲營諸伏兵齊發格殺
賊五十餘級奇兵劉懷者手斬守甲虎叢金蒂
諸散走者伏兵盡追殺之中科解守甲虎叢金蒂
飾以雙龍刀刻五星文蓋臬虜云守既殪西南
符苴蘭靡莫諸酋長皆震怖於是高山四堡大小
七枝諸西番爭乞降各埋二奴於道合掌頂佛經
誓如西羌故事是時之翰於越嵩伏兵大孤山掩
黑夷酋長生得阿弓凹溪咱等七大酋一則手刃
千戶丁應時者越三日戊申之垣擒五哨於昌州

初軍圍哨急哨遁將軍授指揮王吉計且屬之垣
伏兵擒之七免憇安四兒自知罪浮五哨擒次
必及先聚黨數百据虛郎箒以待將軍乃召紹良
佯責之曰若自治羯奴亡久煩官兵也四月辛酉
撤各路兵故有事於邛夷建父老來謁請留兵者
謝不與見癸亥見旗鼓北行諸裨將先一日發是
夕四兒自顧其部落曰總兵循河北去矣且解甲
寢夜半將軍率諸將悉返甲子昧爽兵抵賊砦光
國先登破之四兒走文傑兵躡之西番擒之是日
建城發兵捕其妻妾并其弟破波把事張燁盡殺
之燁故陰賊挾四酋以亂土官中葺每以睚眦殺
人莫敢問者至是始正其罪云庚午將軍之冕山
是日建千夫長趙應宣與王大哨賊通者王哨走
匿普雄酋長姑哨所丙子文達之翰軍於普雄之
五里箒之垣軍於桐槽之哩波羅為犄角勢之翰
乃引兵就王哨所藏洞穴擒之哨中流矢死是日

文達兵攻南菁黑骨巢之垣兵攻桐槽鐵橋邨盡破之共斬首七百有奇二酋既死黑骨亡得脫黑骨故邨都所部乃唐雨林蠻史所稱邨都最大者以有君長也今邨都領印與百夫長等故上官嶺柏妾沙氏淫於族人阿祭負印歸之孽子應昇爭不獲祭死其子鳳起勢益強應昇曰醜酒為廣洪番所制至是議者欲征鳳起以及臧乃然道遠終不得要領議未決公遣華陽劉令寅檄王之翰諭鳳起鳳起恐內印乃釋去而廣洪番故殺應昇者屬之翰將兵二千破之斬百級是時公方欲下令解甲而前所遣防臧乃三將違節入臧境營於涼山臧酋撒假故凶狡歲帥衆出沒縈丁榻因間別孕烹嬰填肉盈坑侵越地二百里與中鎮白祿枯須為死黨黃婢夷安興楊九乍為姻婭至是興九偽降導官兵深入伏發三將死焉報至公復手疏請討分兵三道遊擊周子德守備滕光國出中鎮

副使武尚耕監之叅將郭成朱文達都司萬鏊出
馬湖副使李士達監之遊擊邊之垣行都司宰調
元出建越防賊逸副使周光錫監之叅政周嘉謨
督餉右布政使彭富叅政張孫繩後先紀功而李
將軍應祥居馬營權四面都護仍徵土漢兵共四
萬有奇以冬十月出師公移鎮嘉州兩監軍議曰
中鎮白祿枯須二酋實翼撒假枯須自識涼山之
逆歸而略血死白祿及諸將而匿其蓋與於家此
於法亡赦惟是上下六落熟夷元未助克請無筋
無骨用廣招來又膩乃黃螂並討彼必并力抗師
而黃螂屋江喬上亡若姑拊黃螂以便輸而分膩
之勢俟膩平師歸挾凶酋繫之公稱善十一月戊
申中路兵先入賊悉衆保官廖河庾戍于德遣天
全兵擊之而令酉陽兵擊萬鷄坪賊阻河拒敵光
國兵衛其剋酉陽兵潛亂上流出賊後撓之賊潰
走泠溪河李將軍以十二月甲子督馬路進攻它

黑擒其首脚舌脚阿丙寅中路兵悉抵枯樹坪
光國守官廖以過煖歹已已克馬蝗山山迫既賊
礮石如壁我兵仰攻不克于德遣酉陽兵攻山前
牽賊而自將標兵宵度火燒崖遠出山背夾攻之
賊不能支棄山遁大鷹崖殺馬溪溪險惡賊巢絕
壁下我師攀藤策杖不得入癸酉馬路兵克白它
天星困先是成遣上舍文安民諭安興待以不死
意興中持假九乍集賊萬餘團四山分枝接戰矢
石如雨下我兵冒險攻之播州兵先登各路兵銳
箭齊擊賊大敗遁除夕甲申武監軍趣中路兵乘
賊懈渡馬溪營於木瓜與賊持明年正月己丑假
糾衆山大南門大木瓜兩路突襲馬營播州帥楊
應龍率衆大呼衝之賊退壬辰中路兵攻木瓜斬
白祿於陣祿屢敗恚憤至是糾賊千餘從大赤口
出木瓜躍馬督戰甚銳酉陽兵伏弩矢中之祿死
獲其黨已別阿尼等斬獲無算壬寅馬路文達整

兵破小木瓜二月己未中路兵發木瓜進次於出水坪明日渡利濟山士穿雪蟻附達山椒營焉辛酉破大木瓜大口獲夷器夷書牌甲及涼山營將衣蓋癸亥中路兵焚西姑擺允瓜等巢馬路兵擣大小木瓜等巢是時公自嘉移鎮叙州趣諸將擊賊籌水陸運道革抉啖芮亡不具庀直指何公趣川東庾粟千艘至軍中益踴躍甲子建路調元之垣兵破敗於梅古河乙丑文達兵擣假巢假僭西國平天號堂皇樓室大踰制密苦菽圖根不訾谷量馬牛至是我兵資糧於敵無慮飛輓矣乙丑允瓜呬黑等夷來降不果庚午建路兵破賊於普沱河辛未中路兵焚大赤口巢癸酉破虎背崖乙亥馬路成兵分三道直搗賊乃諸巢賊男女突逸悉擒之丙子文達整合兵攻魚塘口斬白魁魁故殺李獻忠者丁丑建路守備王之翰遇賊戰於凹曲脚河破之戊寅馬路成兵遇賊於葫蘆山大

破之三月己丑馬路諸將合兵攻涼溝鏖戰於萬鄉谷獲白魯阿什咱假弟也庚寅破拖梅河甲午兇爪賈書等乞降於中路獻馬甲公許之辛丑馬路兵破小凉山庚戌鏖兵破老鼠囤擒假妻男女是時假竄沙馬氣益奪中科兵破虎頭囤擒阿咱咱故殺尹從壽者四月甲寅文達兵破鶯嘴崖辛酉成兵連破七洞關石崖白崖革它洞假與心腹勁夷四十人伏三竇山石壁中我兵架連梯迫之從夷多射死遂斬假醢之假自其父普書伯約鴟張虎闕號唾普王世濟其允至是乃伏天討云己卯破它黑擒西姑擺壬子移師攻黃蟒破祛裏密俘安興母楊氏興適五月乙酉破海腦辛卯破卯古俘興妻沙氏辛酉鏖兵攻石坡羅坡因乃俘安興安興者故土知府嗣也貌雄傑力敵百夫居嘗自言馬湖我故宅我必復之及假誅興自虞不免與安勉據祛裏密抗官兵至是就擒惟九乍未獲

獲其妻馬氏公念佳兵不祥不爭事末諸夷累累
降者與之更始如日者松潘建舊故事還侵地畝
血聞牛革埋奴為誓戍寅下令班師公疏文武將
吏功次於朝各陞賞有差更畫善後策十五事移
兵備以資彈壓置安邊以固封守設拊夷以便分
理開縣治以育殘氓改守備以据要地設巡檢以
轄黃鄉定酋長以束邛夷修武備以控要荒設堡
墩以嚴烽堠正疆界以杜侵爭清土田以供邊餉
撤守戍以省遠徭更勅書以專責任遴守備以馭
窮陬簡職官以裨始事上悉從公請下其議著為
令夷論曰古今武功著於西南夷者建元之後有
武鄉文饒然未有一時並舉如徐公之出奇制勝
者考上下川南叛獮在建昌有木託安守樟木箐
五咀咱之害在冕山有桐槽王大咱之害在越窩
有邛部黑骨夷之害在義眉有膩中瓜夷之害在
馬湖有膩中凉山赤口與黃雷之害此皆各負虎

端名雖不同陰相構結往往合羣虎而後從事不
有以大和之猶厝火也三征既定旋圖安輯公豈
不能盡諸羌而芟雉之裸與番界匈奴姑留以蔽
我耳留侯勸高帝捐關以東棄之三人以圖楚趙
中令不欲獨當邊患
故留太原職此志夫

沈朝煥復綠雪亭記

團空粉塊感象化之遷流追昔愴今憑物情之契注眷焉

自托雖一室而永天晤言浩矣無涯豈陳迹而遂
遺襟抱臯壤搖落祗觸悲秋人代差池徒深弔古
臬臺此署建置何年白馬褰帷久試經綸之手碧
鷄持節相傳黼黻之工地近錦江亭開綠雪儼美
人之在空谷幸此君之傍西窗宜對琴書虛比郎
官之筆能清案牘寒凌御史之霜迺有東谷教公
爰及西涯顧老雜言有紀述美成詩博求剡水長
箋編摩不乏豫畜武夷健筆題什常函石甯松篁

偏動晁補之之夢想錦屏筠石不辜喻汝礪之風
流雪色不移真心有藉嗣以情遷傳舍遂令迹冷
雲闕修修沈葉底之蕭湘冉冉迷枝間之淇澳江
州墮林粉竟蝕苔紋渝野竹枝詞亦成孤嘯雖省
完布法表正之闕歸然而燕生凝香晤對之區寂
若每紛紜於簿牒義斷瑟歌時空俛於科條生虛
酒賦跡隨人往勝以塵淪步履前賢求面目於殘
書廢禮嗟哉故壤付感嘻於敗葉遺藁欲拓新懷
聊存舊事或並美於文翁雅化遺成都之講堂差
比踪於閔道琴清續華陽之國志如其爾爾亦示
毋忘其高雅者可留刻竹之題即塵趨者亦免食
肉之俗圖為不朽共希大隱之高風傳之其人庶
幾比德之君子恭
疏短序用遣公餘

曹學佺萬縣西太白祠堂記

縣西有太白巖在
山即絕塵龕也王象

之輿地碑目云絕塵龕三字在西山石壁上字畫瘦勁類晉宋間物唐人題咏甚多相傳李太白讀書於此有大醉西巖一局碁之語太白蜀人也其詩之見於蜀者若成都散花樓漢嘉峩眉山白帝城蜀道難等篇在集中可攷而紀事稱其為彰明小吏時令屬詞不偶輒為接之令避其佳以此見妒則東蜀楊天忠所載也予得諸碑刻有題江油主簿廳為米芾書及象山留題云夜來醉卧月下花影零亂滿人衣袖恍如濯魄於冰壺也此真天仙語本集皆不載而涪陵有渡曰李渡以太白曾渡此即婦人稚子能知之矣獨萬縣西山者不甚著聞至為天仙橋以別之而過者未嘗問也予詩落句云一自金陵問消息無人指向萬州看蓋甚致慨然黃魯直勒風院記謂西山之勝東望巫峽西盡郾鄠不敢與之爭抗魯直在蜀久斯言不誣予謂太白讀書此嵩中宜有太白祠而萬令方君

好古樂善予門人典客陸昇彤等唯唯叶力遂書
源委於道士常明且系以詞曰太白先生金行之
精隴西帝裔產於昌明起家小吏不習逢迎牽牛
堂下諧謔隨聲逢彼之怒離鄉遂輕扁舟下峽出
白帝城顧瞻西山蔚苑崢嶸挺然拔出巧類削成
素開練石翠點秋屏絕塵龕上夫非世情西泊屐
迹讀書著名何時非醉而忍獨醒何事非局遑問
變更事在有無語類不經人心愛之夸詡為真樹
若曾倚其色敷榮泉若曾酌其聲清冷何以祠之
尸屐上平裁虹為棟架空作楹峽江蒼蒼白雲自
橫飛鳥時過嚶彼其鳴薄言訪之而懷友生悵然
不見涕淚沾中聿觀茲役堂構以新懷賢述古二
美則并江山勝豁文明道
亨千秋之後令名不湮

遊我眉山記

出嘉州之西門為我眉徑而我愈用
自遠過津焉絕流者二揭衣者一既

入縣縣田食堰水膏液雲油有沃野之稱遇嶺焉
閣覆於上宋時建魏華父書也首坡名解脫以出
山者釋危就坦至此而盡噫予惡知予出解脫入
解脫即過此為華嚴寺即華嚴峴為純陽殿殿前
類溪有石如船水出灌堰石上龍門二字蘓子瞻
書又過為中峯寺即乾明觀黃魯直居之為歌鳳
臺列仙傳所稱楚狂接輿隱於峩眉山中不知所
終也陳希夷福壽字殊俗筆峩眉神水亦亡謂又
過為雙飛橋山中橋非一此可稱橋一橋受一水
一水自一洞來有黑白之分若挾而舞若搏而赴
勢不相下過橋始狎久之乃濟有石狀如牛心受
水所激而成有前後牛心寺前者白水寺而後者
黑水也孫思邈居於白水今之萬年寺即白水寺
由山下至一舍而遠倍之而近如循牆自牖以達
堂窻每遇一嶺輒如止扉寺前為四達而內則大
宮也其地皆稻田塍埒俯仰隈隩氣候和暖不異

於外有蒲氏邛蒲人居之云漢蒲公之後蓋權輿
是山兩出寺至明月池俗名初喜亭其嶺蔓延行
之無盡石磴難數始治終亂騎已絕輿用二十許
人舁蹲處於內劣似輿形者耳首十人不任輿以
舟視輿背如弓繩如弦猶不滿輿者意左右八人
翼伸縮如猿臂莫之定向輿首者察路如察脈常
若眩次者如眩師或亟跳出輿外或詭入輿內或
同前後左右為一井計二十人之形如鴻雁木葉
偶成文字莫知所以又或作十數層如懸線或擁
腫一處如木癭也輿不可以足代足不可以手代
扶予行者不善地以善讓於予善在左則棄右者
善在右則棄左者亦時而下下不十上之一輿相
詬厲彌甚首者拊不任輿者背如相替然畱十數
人後後者躡石石隨足下擊前者足驚全輿前者
交平地欲趨後者未脫險不能從出初喜亭至化
成寺俗名木皮殿徑一嶺狹束如溝水所流注多

磊砢善脫足謂之滑石溝也由木皮殿至雷洞坪行者禁聲有禁聲碑輿三十人他輿者半共百五十人俱行篋篠灌莽中若不相顧若夢與人語而人不應其木連困糾紛或寓或族或相切磨或自弊死或翹繚而句或無枝而檄每上一崩不能半望若青天則有樹立於旁為客繇役而惺肝也木皮殿以上磴不能石壘木如馬齒雷洞坪以上樹不能枝向空如虎爪由雷洞坪至天門石路詰曲為八十四盤峭直纔減半梧立當途或出其前或出其後又或出其左右而還之輿者實則輿向空久始實輿者空則輿此礪地有聲而過門以外為娑羅坪娑羅其葉冬青其花蒼蒨其色赤白木皮殿以上皆有之然有雜樹故不之稱稱天門天門樹娑羅三之二松居其一有一松枯而復榮定者居之將合無迹也門內有橋曰天橋有井曰井絡有臺曰光相臺有鐵瓦殿昔建有銅殿今建有菴

以棲禪者予登乎臺焉其穆穆肅肅者耶其明明
斤斤者耶其見乎蒼蒼之色不在穹窿者耶其於
世也悠悠洋洋者耶前之岷江大出而尾下也背
之瓦屋上正而平章也遠之雪山纖浮而汨沒也
予何以知朱明之別於懸英又何以知皋且之別
於辜涂何以知靈暄靈震之相終始何以知蟬煉
挈貳之自消息又何以知奔日覆雲之不為暈氣
五采耶又何以知人世之雕繪而繡錯目眩而心
亂者之有異乎此耶噫觀止矣學佺曰予遊名山
多矣直上百里無所因緣則未之聞見也高出五
嶽秀甲九州天竺先生之言也楚人李維
禎述於臺側李公本寧前予守四川也

李廷謨成都使星亭記

天漢至建元元光之際鴻
隆漢燦上有好大之主而

一時景附而起者率皆盛氣奇詭喜非常而慕遠
畧故通西域朝夜郎而士曠目進勢猶振振未已

也博望僅僅具圓首方趾乃侈言河源事與其徒數十人乘槎仗節輕陷似人之境卒之精神所通上浹河鼓紀載客星犯牛渚非漫語也後之好事者遂譚博望得織女支機石歸於成都此甚怪誕又安知宇宙之大類非目睫之士所可覩詰吾又烏敢信其為悠謬耶余守官成都日過進士鄭子之廬望其北鄙有支機坊余欣然却與導縱觀之見一石亭亭立荒臺中蜀父老蹠曰此博望張侯支機石也余夙慕博望之為人徘徊不能去因命吏鳩工捐錙俸以繕之工始於中夏幾望成於臯月之晦因題其額曰使星亭嗟乎世信多偉才然至履危蹈險鮮不卷舌龍鍾而縮避者豈盡乏疏節母亦內顧之念侈於奉公然乎博望之神遊牛渚其事固甚倣異不可解詎非一念奉公之精誠靡感弗通也耶是以樂名吾亭以風後之勵臣節者

黃輝采木記

采木國家鉅役也費至重力至勞矣天下之所無奈何而不可以已者也

詎宜以可奈何之心當之而姑為如得已之法存之哉自明興迄今不知為役凡幾慮無不督責有司而拮据民運者於國得矣如民何大中丞聚垣喬公以丙午入蜀理木政者六年於茲痛鑒已事九郡各簡一賢佐主之而直隸州六各主以刺史召商採辨民惟所號令焉更念役重賦繁公私困誑會疏題請減派額寬解限議協濟請內帑設專道皆報可始於民間照丁糧量加賦一年此外毫無干預焉初中丞鎮蜀日塗播故無何復憤壘蠹之恣虐赤我郊原則多方勸分賑濟粥而藥之民乃稍稍有起色而上亦念夜郎兵燹後方慙慙歲大旱頻仍復事采木其母乃不堪命已感中丞繪圖抗疏備極忠懇聖母聖上洎宮中咸為憫惻合賜金五萬特遣使臣宣布詔命萬里推輓西入斜

谷至蜀郡徧賜燹獨贏閭葺屋咸舉手加額乃知
上及聖母后宮之仁聖雖高居九重乃心固不在
赤子卽胼胝竭蹶其何以報萬分一迺立章程告
戒凡我在事如有踵襲故弊僉派滋擾偷安糜費
者以白簡從事有司受命凜凜又下令曰訪聞滄
夔間有附近止賴假托上商詭故影射欺官商在
遠私移芥記改飾偽號而串同守戶別立契券矚
有各處漂流巨材輒圖姦騙捏詞誣誅官商多被
挾誣訟端閃爍難可立斷遷延時日儼幸計得官
商橫遭局騙因之誤事貽害無窮自今敢有舞弊
行私作姦犯科者司道究遣法無寬中飭再四而
止賴之徒奉法唯謹於是上下一心萬衆響應邪
詐瀆洞聲震陵谷無翼而飛不脛而馳右滄左夔
望質如歸連艘率簿蔽江東下計八千餘株叅天
翳日皆清廟明堂之選也木政告成里中縉紳士
民動願相慶移書不佞曰自中丞視木政凡六稔

矣博考前事罔不以民采者大戶義民隨意僉報
編夫派米需索津貼剝膚椎髓民不聊生白骨枕
藉自李直指方麓公首倡官采之議僉曰然中丞
接部檄毅然以官米從事蓋二百四十餘年所未
有也而奉行自中丞始是役也派米至二萬四千
六百有奇價至四百萬而僅加一歲賦仗國家威
德幸告竣事皆中丞之大有造於三巴也太史盍
記之以垂永永史輝氏曰吾生又二歲一甲子耳
而采運凡四畷時間長老傳述猶髣髴記之逮丙
申采運則典在太史矣大都肅皇末政權焰四爍
訶讓聲嘗自二千石以下義民大戶惴惴股栗僅
僅成事丙申之役民夫餒死相望數郡怨苦之蓋
吾生與木政俱今而後知木之有政也先是嘉州
守徐學周目擊采運之苦著采木哀鳴錄款列凡
六難中丞公讀而傷之曰險阻艱難誰親於其身
嘗之者誠嘗之雖曰百難可也故木政雖督厲勤

至而撫綏愛養殆不遺力云往中丞貴邑少司空
楊公和洪熙元年奉命采木於蜀至今二百餘年
而中丞再領茲役焦屑乾肺以為民求萬有一分
之便因以想見楊公之苦心焉以不恒有之役不
忍見之苦而一邑之中中丞與司空兩肩其事豈
不異哉夫人臣之誼不過捐軀為國耳然用之伐
叛勦逆則功高而名顯用之采木則竹帛不書人
固有幸有不幸耳雖然漢柏流香泣秦彌甚海濱
騰葉望雉長飛弱植表異於一時而光物必傳於
後世王彌胡覽名且不泯安在其竹帛不書耶今
中丞洞曉物情妙施調劑算無再計舉即萬全梯
民運而為官導經營之大窾若喬中丞者可謂高
出千古矣中丞名璧星字文
見直隸真定府臨城縣人

曹楷遊瑩華山記

瑩華接岷山南走高百里許其
最高峯皆白石森列望如削玉

盛夏積雪不消章洛諸峯蒼翠層疊於外余舊欲
一遊未暇歲辛丑方僧談及興不可遏乃於六月
十有八日甲申策蹇裹糧偕僧行快風願焉是日
初伏酷熱如蒸二十里午憩自魚菴茂林修竹坐
盤石上清風徐來漸不知暑十里晡宿洛通鎮登
高境闕思開明帝李守疏水功不在禹下乙酉入
關二里飯夫子院院乃明道伊川二夫子講學處
望峯峯夏雲竒怪橫倚天末西行二里臨竹溪河
俄暴雨彌西山集河平深三仞許闊二尋勢洶湧
入山者恒病涉近余姪即墨尹文煒製錢鋪橋往
來便之五里小憩白果菴東折則板磴嶺嶺高五
里望南泉庵諸峯入雲而瑩華全勝為彼所障嶺
徑陡峻舍蹇斷竹為筇攀藤旋轉至嶺藉草少坐
五里至鐵碑殿南泉僧迎片雲黑頭上僧曰行宜
速前雨且至行里許抵南泉入門而大雨傾注巖
壑四蒸其庵寺嵌巖幽處隱約有無亦佳景也庵

乃曲阜禪僧真清新創者有樓高五十餘尺詳受
庵周都憲銅碑中山氣覺寒解締衣布蓋入闕至
此草木繁蔭蔽翳雲日山鳥和鳴如奏笙簧山花
爛漫如鋪錦繡竹木茶漆藥材之利農工之器絡
繹於道旦旦出闕而山不童丙戌雨霽山色如洗
望瑩華僅露夫如馬耳出翠微上北折盤屈十數
里至中觀庵風氣加寒始狹縵庵僧留余宿且云
此山有聖燈雨後初晴尤可觀余聞欣然為止薄
暮山色黯黯忽有光數點閃閃而上僧曰聖燈現
矣漸添千百浮游無定如螢火說者不能堅決俗
傳仙聖設化然光有飛墮者拾觀乃碧色木葉疑
山產靈藥時有飛葉生光晝則隱爾丁亥侵晨上
數十轉東望一峯拔起千餘丈如馬仰臥方僧云
此石馬峯也左右上下又二十餘里過高樓峯中
瑩庵自此至頂雪堆巖壁第無新降者方僧云頂
上有之又上五里憩木皮殿不宜瓦為霜雪所薄

易碎惟木皮可支三四年又上六七里泥淖不可
步僧鑿木橫架為磴抵金蓮池菴宿菴創始於麻
城禪僧真融鑿山建樓視南泉二十餘尺殿廡皆
具命其徒於楚雄鑄千銅佛名千佛樓戊子頂
心坡約十里進此則千峯萬嶂天造地設瀑泉直
下懸崖如飛練如水蘆暑肌起栗骨驚神慄不減
雁蕩龍湫之勝而草木禽蟲悉非世間所有矣花
異色者尤多人鮮識之勿羣鳥呼阿彌陀佛形如
白頭翁頂綠身褐色聲類嬰兒余甚訝之方云天
雨恐難登至金蓮日光皎潔詢僧數日無雨蓋高
出雲端也又上過三稜坪僅容足蜿蜒三里名酥
骨嶺嶺兩傍深澗喜嶺遶樹根結如鵲巢可穩足
枝葉交遮澗谷目得不眩好事者推石下澗聲如
雷轟移項不止兩崖怪石成幢蓋仙人龍虎之形
種種逼真又三里上雷動坪相傳崖洞有淵水神
龍所居過此必寂或呼嘯即雷動澗底北上三里

登鐵瓦殿連錫瓦殿又以木皮難久故易鐵錫殿
西平行里許為觀佛臺方數十丈東為田光山又
北平行三里名三刀截乃白鹿引明本禪師開建
道場處石嶺三段如削僅僅托足上下懸鎖兩手
攀援而過過此一里為願海本師水齋時發六十
四願處產短松婆娑斗如螺髻名佛頭青及四季
石榴此後山峯壁立最高最峻名背光連排十數
峯即邑望如削玉者初日照之雪色洞明如爛銀
晃耀暑光中此雪自古不消余環坐鐵瓦殿前俯
視前所歷諸峯近在几席如劍戟星攢而闕口如
外門余邑及古綿旌陽天彭之城各圓如玉環綿
洛諸江曲曲如帶邨落如蟻垤稻田青黃碁布如
錦段遠望成都烟靄隱隱余因笑登山百里而見
塵世趣趣如此矧仙人飛身九霄所見又何如耶
山頂最寒加狐帽裘猶凜慄殿中然薪擁爐圍坐
丙夜月升半映照殿前余啓扉視之山光映月霜

鷓水淨星斗可摘混然一白如北征錄所狀長白
山境已丑卯日光射觀佛臺西澗雲紛郁而上澗
滿輒止雲平如玉地有鳥類畫眉呼佛現余尤訝
之遂偕衆至臺果現大圓光偃卧平雲光與雲漸
升得得倚立西澗外象王峯漸大徑百丈遮峯岩
有青黃紅綠之暈數重光正中虛明凝湛現一淡
黑影恍惚佛像食頃方隱余歸殿中隨千人作佛
會僧以餘粒拋廊廡則異鳥鹿麀依人而入蓋人
至佛地不生殺心鳥獸未遭罟罟故相忘如太古
非海翁忘機類中日射東有紅綠暈二重現回光
山較外畧暗北升背光山一茶頃而隱初衆觀光
現信佛出膜拜余意山必有放光石藏崖中如峩
眉者故雲日相射如端竦然不然何朝西而夕東
耶光圓者何日體圓凡專射之光必圓革象新書
所謂樹隙瓦縫尖方不同而影圓則一也兩鳥音
恐近似人從而神之是夜風起雪霰飄至方僧云

天欲雪夜參半歌枕聞雨電聲方僧對榻云雪且
降前言信矣庚寅大雪深二尺瀾漫布護山鳥壑
獸避入廊雪風刮面闔殿門對火不敢出遲明辛
卯雪止縱觀孤峯峭壁箐林陡澗景更奇絕如在
水晶域因憶錢塘友人曾詢茂州六月下雪余諾
之未深信安得縮地同賞實余言乎此山連峩峩
嶺為兩戒山河之首雪宜同也俟壬辰雪霽支筇
踏舊徑下至金蓮池出雪境解裘氈癸巳過南泉
中伏熱甚仍衣絺別方僧還此余不離
鄉園而十日之遊冠平生者故悉紀之

合州釣魚城記

舊志未載名氏城在州治之東
北渡江十里至其下其山高千仞

峯巒岌岌聳然可觀其東南北三面據江皆峭壁
懸巖陡巖阻絕修城之後鑿山通道路曲之次方
可登臨其西南山稍低於此築城高一十仞城之
門有八曰護國青華正西東新出奇奇勝小東始

關其山脚週迴四十餘里峯頂有寺曰護國堂殿
廊廡百有餘間宋紹興間思南宣慰田少卿所建
至元戊戌為兵火焚熄灰燼寺門之外突然一臺
曰釣魚臺其上平正可坐十餘人上有巨人足跡
年代雖遠風雨不能磨滅岸邊插竿之目猶存焉
此臺乃在山之巔俯視大江懸崖千仞相去險遠
釣可施乎名為釣臺似不忤矣竊嘗稽之古之洪
水為患蕩蕩懷山襄陵此山三面據宕渠嘉陵二
江自西北而來衝於山之西流至合州城下則與
涪江會同皆浩浩蕩蕩環繞山足而東下往古水
患之際勢必懷抱此山則釣魚之名必自始矣乎
後有石庵凡二十四片石斲成乃開山祖僧石頭
和尚自造也宋高宗南渡之後北兵益熾彭大雅
奉命入蜀令郡縣圖險保民大尉甘閏至州觀此
山形勢可以據守故城之郡牧王堅發郡所屬石
照銅梁巴川漢初赤水五縣之民計戶口八萬丁


一十七萬以完其城西門之內因溝為池週迴一百餘步名曰天池泉水汪洋旱亦不涸池中魚鱉可掉舟舉網又開小池十有三所井九十二眼泉水春夏秋冬足備不乾城中之民春則出屯四野以耕以耘秋則收糧運薪以戰以守厥後秦鞏利河之民皆避兵至此人物愈繁兵精食足兼獲池池之利官民協心是以能堅守力戰而効忠節東有溝曰天澗溝東北有山曰天澗嶺龜山與魚山對峙城上呼語相聞元憲宗玉克以此駐蹕王堅去任之後總任乃安撫張珙也有謀畧應敵出奇制勝尤有過人其時北兵大營駐漢中利河初冬嚴寒則來攻圍春夏暄熱則復退去已未歲值大旱自春至秋半年無雨北兵圍逼其城意城中無水急攻之一旦至西門外築臺建橋樓樓上接桅欲觀城內之水有無城內知其計置砲於其所次日憲宗親率其兵於下珙命城中取魚貳尾重三

十斤者蒸麩餅百數俟緣稅者至其竿木方欲舉首發砲擊之果將上稅人遠擲身殞百步之外即遺鮮活之魚及餅以贈諭以書曰爾北兵可烹鮮食餅再守十年亦不可得也時北兵遂退憲宗為砲風所震因成疾班師至慈軍山病甚遺詔曰我之嬰疾為此城也不諱之後若克此城當赭城剖赤而盡誅之次過金劍山溫湯峽而崩期年之間世祖皇帝即位北兵大集總元帥蒙古等軍於本州雲門虎頭渠口魚邨富峪石子山等處連營對壘攻圍甚急而城中設奇制勝或擊卻之或掩襲之斬獲累捷是後不敢久留城下春去秋來出沒不常者十有餘年安撫張珏以功陞渝州制置使繼以王立為安撫立至任益嚴守備兵民相為腹心聲息稍緩即調兵討捕鄰邑之降北者取果州之青居城復潼遂州境土攻鐵壚城堡承命旌賞擢授遷秩矣至元丁丑北兵攻圍甚急加以兩秋

被旱人民易子而食王命不通三年矣戊寅春正月渝城為守門者獻之北兵矣制置張珩被俘而魚城孤而無援矣北軍畢至攻城且曰宋已歸我國久矣爾既無主為誰守乎城中之民惶惶汲汲危於壘卵釜魚知其禍在頃刻然皆協力而無異謀王立命衆曰某等荷國厚恩當以死報然其如數十萬生靈何今渝城已陷制置亦擒將如之何愁蹙無計歸家不食其家之義妹者乃北營所掠北平渠帥之妻名熊耳夫人初至王立問之答曰妾姓王氏立乃喜曰作吾之妹待我之母待獲爾夫俾其完聚待之若同乳之妹已數年矣至是熊耳夫人憂城危禍及素知有兄在北營而不敢言因見王立之憂而告之曰妹本姓李今成都總兵李德輝是吾親兄若知安撫待我恩禮必盡心上聞親來救此一城人民立乃大喜即令致書熊耳夫人嘗為兄作鞋有式兄甚愛之仍作一鞋以奉

凡見手澤為信遂遣儒生楊獬等潛赴成都納款
李相得其降書知妹在魚城喜不自勝乃遣使星
馳赴闕聞奏仍領兵親至城下先遣獬歸語王立
黃夜豎降旗於城上次日北兵見說納款降欲登
城而門閉壁堅而不能入又次日乘舟至城下民
皆歡呼焚香望拜李相公麾退圍兵汪總帥蒙古
軍曰我等攻守此城十餘年戰而死者以萬計憲
宗皇帝亦因此城致疾而崩臨崩遺詔來降必因
攻困致斃赭城剖赤當上為先帝雪恥下為士卒
報仇李相諭慰未決又數日朝使適至奉詔旨魚
城既降可赦其罪諸軍毋得擅便殺掠宜與秋毫無
犯李相仍推其功於汪總帥賚立降書大軍隨
退李相令城中之民悉力修城築門旬日仍徙其
民復舊治所士農工商各復其業黔黎老稚咸感
李相再生之恩安撫王立隨李相至京奏賀對品
蒙授懷遠將軍合州軍民安撫使合民遂於城之

西南隅建樓立祠以奉李忠
宣公歲時祭祀以報其恩云



四川通志卷四十二